

Carta nu cuítí naçahyí Pablo nuú na cúu cuéntá Jesús ndúu ñuu Corinto

Cáhan Ndióxi Pablo xihín na cúu cuéntá Jesús ndúu ñuu Corinto

¹Yehe cúu Pablo, da naçaxi Ndióxi cacuu apóstol cuéntá Jesucristo jáchi já cúní a caja. Yehe xihín ñani Sóstenes ²chindahá nde Ndióxi coo ndó, na cúu cuéntá Jesús ndúu ñuu Corinto jan jáchi in cúu ndó xihín Jesucristo. Mé Ndióxi naçaxi a ndohó cacuu ndó ñayivi yíi, na nandiquiahva mé ná ndáha mé á. Ta quiahva já naçaxi ri a java ga na ndúu ndijáá ñuu cacuu na cuéntá mé á, na cája cáhnu Jesucristo, xitoho í jáchi cúu ri a xitoho mé ná. ³Ña cúní queá ná caja Ndióxi, tátá yo xihín Jesucristo, xitoho í cuahá ñamani xihín ndo ta ná caja mé á ña ná coo vaha ini ndó.

Ñamani cája Ndióxi xoho sahá ña cándéé iní Jesucristo

⁴Ní tiempo ndíquiahva í ndixahvi nu Ndióxi jáchi naçaja mé á cuahá ñamani xihín ndo sahá ña cándéé ini ndó Jesucristo. ⁵Ta sahá ña in nanduun ndó xihín mé á sahá ña cán queá naçaja Ndióxi cuahá ñamani xihín ndo já ná cuu çahan vaha ndó saha mé á. Ta já nasuná a xíní túni ndo já ná candaa vaha ini ndó saha mé á. ⁶Ta ña naçachi í xihín ndó sahá Jesucristo naixinu a ini ndó ta viti cája ndó ña cúní mé á caja ndó. ⁷Ta viti nani ndátí ndó quíví quixi tucu Jesucristo, xitoho í ñuyíví yóho ni in túhún toho ñaha a ndímani nu ndo ña ná caja ndó ña cúní Ndióxi jáchi nasahan mé á tóco ndihi ñaha nu ndo. ⁸Mé Ndióxi chindeé a ndohó já ná caca tuun ndó íchi cuéntá mé á janda quíví nu ndíhí. Ta já ná a cúu chícaan ñayivi

cuachi jata ndo tá ná xinu coo quiví quixi tucu Jesucristo, xitoho í ñuyiví yóho. ⁹ Jáchí cája tá cája Ndióxi ña sáhan mé á tũhun a caja. Ta mé á queá naçaxi a mí ña ná in cacuú xihín Jesucristo, xitoho í ña cúu in túhún jini já jahyi mé á.

Táva xoo java na cúu cuéntá Jesús mé ná

¹⁰ Candehé ndo, ñani mí i, na cúu cuéntá Jesús. Xíca tahví i nu ndo xihín quivi Jesucristo, xitoho í ña ná ndique táhan víi tũhun ndihi ndó ta a cáhnda táhan ndó. Xíní ñúhú cuni táhan vaha ndó ta in túhún ñaha cañuhu ini ndó saha. Ta quiahva já ndítahan coo jini ndihi ndó.

¹¹ Candehé ndo, ñani mí i, na cúu cuéntá Jesús. Cáhan i ña yóho xihín ndo jáchi naçaxi tũhun na vehe Cloé xihín i ña ndaja mé ndó cáni táhan ndó. ¹² Jáchí nañehé e tũhun ña java ndó cáchí ndo ña cúu ndó cuéntá yehe, da cúu Pablo. Ta java ndó cáchí ndo ña cúu ndó cuéntá Apolos. Ta java ndó cáchí ndo cúu ndó cuéntá Pedro. Ta java ndó cáchí ndo cúu ndó cuéntá Jesucristo. ¹³ Ta xihín ña yóho ña cája ndó queá sáhnda java táhan ndó. Cándehé ndo. Coó naxihi i, da cúu Pablo ndica crúxu saha ndo já ná jácacu u ndohó. Ta ni coo naçandúta ndó cuéntá mí i.

¹⁴ Ndixahvi Ndióxi coo najácandúta i ndohó. Jáchí ndájá ga ví cachi ndó cúu ndó cuéntá yehe tá ná jácandúta i ndohó, nduu. Joo da najácandúta i cúu Crispo xihín Gayo cuití va. ¹⁵ Ña cán queá ni in túhún ndó a cúu cachi ndó ña naçandúta ndó cuéntá mí i jáchi coo najácandúta toho i ndohó. ¹⁶ Ta ndíçuhun ini i ña najácandúta ri na vehe Estéfanos. Na yóho cuití cúu na ñúhu ini i najácandúta i.

¹⁷ Jáchí coo naçindahá toho Jesucristo yehe ña ná caca nuu i jácandúta i ñayivi. Naçindahá mé á yehe ña ná caca nuu i çahan i tũhun vaha saha mé á xihín ñayivi já ná cuu çacu ndaa ínima ná. Ta coo toho tũhun ndíchí çahan i xihín ná jáchi coo cuni jánuu ndáha i xihín tũhun çahan

i yóho tóco ndihi ña ñacaja Jesucristo tá ñaxihí a ndica crúxu saha yo.

Ndíchí jini Jesucristo ta ín ndéé mé á quíxi nu Ndióxi

¹⁸ Ñayivi, na xíca cuahan ndihi saha ná ini indayá, mé na cán cáhán na ña cúu yó na tachí tá cáhan yó ña ñaxihí Jesucristo ndica crúxu já ná cacu ndaa ínima ná. Joo nu mí, na ñasacu ini Ndióxi jácacu a cávatá yo cándaa iní ña xihín ndéé Ndióxi ñaxinu tuhun mé á nu yo. ¹⁹ Já cáchí tuhun Ndióxi já:

Jándihi i sahá ña ndíchí jini ñayivi ñuyíví,
ta a quehe e cuénta sahá ña cándaa ini ñayivi, já ñacahyi
a nuú tuhun Ndióxi.

²⁰ Sahá ña cán queá coó saha toho ñaha ñuyíví yóho nu Ndióxi vatí da ndíchí jini xihín da tácu ini cáhán da ña cúu dá da ndíchí ndivaha sahá ña xini da cahan da sahá ñaha ñuyíví yóho. Joo ñacaja Ndióxi ña ná cacuu a ña coó saha. ²¹ Sahá ña ndíchí jini Ndióxi, co cuni mé á ña ná cuu candaa ini ñayivi saha mé á xihín ña ndíchí quixi jini ñayivi ñuyíví. Ña ñacaja mé á queá ñachindahá a java ñayivi ña ná cahan na tuhun vaha saha mé á já queá ndá na cándusa ña ta cándeé ini na Ndióxi já cuu cacu ndaa ínima ná. Ta ña yóho cúu á in ña tachí ndivaha nuú ñayivi ñuyíví.

²² Jáchi ñayivi Israel cáchí na ña ndúsa cuni na ña xituhún ndivaha já cuu candúsa na tuhun vaha saha Jesús. Ta na tóho, na ñuu Grecia cuni na ña ná cahan ndíchí ndivaha ñayivi xihín ná já cuu candúsa na ña. ²³ Joo mé nde xíca nuu nde cáxi tuhun nde nuú ñayivi sahá Jesucristo, mé a ñaxihí ndica crúxu sahá ñayivi. Joo tá xini joho na Israel ña yóho já ndíhivi na. Ta tá xini joho na tóho ña yóho já cáhán na ña cúu á ña tóntó ndivaha. ²⁴ Joo tóco ndihi na ñacaxi Ndióxi cacuu na cuénta mé á, á cúu ná na tóho á cúu ná na Israel, cándaa ini na ña cáhan

nde sahá Jesucristo, ña fin ndée mé á jácacu a ñayivi. Ta xini vaha na ña ndíchí ndivaha jini mé á ñajaja Ndióxi. ²⁵ Nuú ñayivi ñuyiví ña cája Ndióxi cúu á ña tóntó ndivaha. Joo ña cája Ndióxi cúu á ña ndíchí chága nu ndíhi ñaha cája ñayivi ñuyiví. Ta vatí cáchi ñayivi ña co ndiyahvi ña naxihi Jesucristo ndica crúxu joo yahvi chága ña yóho a juú ga inga ñaha cuu caja ñayivi. ²⁶ Candehé ndo, ñani i, na cúu cuéntá Jesús. Ñaxaxi Ndióxi ndohó cacuu ndó cuéntá mé á vatí chá cuití ndó cúu ndó ña ndíchí jini nuú ñayivi ñuyiví. Ta chá ndó cúu ndó ña náhnu nuú ñayivi ta chá cuití ndo cúu ndó ña cuicá. ²⁷ Joo ñaxaxi Ndióxi ñayivi, ña cáchi ñayivi ñuyiví cúu ná ña tóntó jini já queá ná cacahan nuú ña ndíchí jini. Mé Ndióxi ñaxaxi a ñayivi vitá ná cacuu na cuéntá mé á já ná cacahan nuú ña náhnu ndúu ñuyiví yóho. ²⁸ Ñayivi, ña coó saha ñuyiví yóho, ña quehe núu ñayivi saha, ña cán cúu ña ñaxaxi Ndióxi. Ta ñaxaxi a ña co ndayahvi toho ñuyiví yóho ña ná nuu ndáha ña náhnu cuéntá ñuyiví yóho. ²⁹ Ta xihín ña yóho cándaá ini ñayivi ña a cúu ndiñehe jícó ña mé ná nu Ndióxi. ³⁰ Mé Ndióxi queá ñajaja ña ná in nduú xihín Jesucristo. Ta ñajaja mé á ña ná ndindíchí jini yo. Ta ñajaja mé á ña ná canduu ndaa yó nu Ndióxi. Ñajaja mé á ña ná nduú ñayivi yij, ña cúu cuéntá mé á. Ta mé á najácacu a mí nuú cuachí. ³¹ Ta já cáchi tuhun Ndióxi já: “Ndá ña cuni caja lándá, xini ñuhú caja lándá ña sahá ña náhnu ñajaja Ndióxi saha ná.”

2

Cáxi tuhun Pablo ña naxihi Jesucristo ndica crúxu sahá cuachi ñayivi

¹ Candehé ndó, ñani i, ña cúu cuéntá Jesús. Tá ñasahan i ñajahan i ña ndaa cuéntá Ndióxi nu ndo, coó ñajahan i ña xihín tuhun ndíchí ñuyiví yóho. ² Joo ñasacu ini i cahan i sahá Jesucristo cuití va tañu ndó, mé a naxihi ndica crúxu.

³ Tá nasahijin i tañu ndó, cōó nandiñehe jícó i mí i. Ña nacaja i queá yíhví yíhví cúú u anda quíji ninu i. ⁴ Ta tá nacasáhá i cáxi tuhun i tuhun vaha sahá Jesucristo nu ndo, cōó toho tuhun ndíchí nacahan i xihin ndo ña ná cava i jini ndó xihin á, vaha. Ña nacaja i queá nacahan i xihin ndo xihin ndée ínima yii Ndióxi ta mé a najáxi nu a ini ndó xihin ndée mé á. ⁵ Já queá ná candaa ini ndó ña Ndióxi queá cája ña ná candee ini ndó mé á xihin ndée mé á. Ta cō cúú á sahá ña ndíchí quíxi jini ñayivi ñuyiví yóho.

Ínima yii Ndióxi cája ña ná candaa ini ñayivi saha mé á

⁶ Joo tá ndítuhún nde xihín na sa cándaa vaha ini ñaha Ndióxi já cáhan nde tuhun ndíchí xihin ná. Joo cō cáhan nde tátuhun cáhan ña ndíchí ndúu ñuyiví yóho. Ta ni cō cúú á tátuhun ña cáhan da ndíchí, da cómí cuéntá sahá ñuyiví yóho. Jáchi yachi ndihi sahá na cán. ⁷ Ña cáhan nde cúú á ña ndíchí cuéntá Ndióxi. Ta cúú á ña nasahijin jehé, ña cō xini ñayivi saha janda tá cámaní cava sahá saha ñuyiví. Jáchi janda mé tiempo já nasacu ini Ndióxi ndá quiahva caja jácacu a mí anda ama caa quivi. ⁸ Ta ni in túhún na náhnu cómí cuéntá sahá ñuyiví yóho cō cándaa ini na ña nasacu ini Ndióxi jácacu a mí. Jáchi tá ná candúsa na ña já queá a cáta caa toho na Jesucristo, xitoho í ndica crúxu, nduu. Jáchi mé Jesucristo cúú á ña cáhnu ndivaha. ⁹ Ta já cáchi tuhun Ndióxi já:

Ni in túhún ñayivi a ñaha cuni na ta a ñaha cuni joho na, ta ni a ñaha cahvi ini na, ndá quiahva iin ña náhnu sácú ini Ndióxi quiahva nuú ñayivi tá quíhvi ini na mé á, cáchi tuhun Ndióxi.

¹⁰ Nacaja ínima yii Ndióxi ña ná candaa ini tóco ndihi ña yóho. Jáchi ínima yii mé á sándehe a tóco ndihi ñaha ta xini a janda ña cáhvi ini mé Ndióxi.

¹¹ Ni in túhún ñayivi cō xini na ña cáhvi ini inga na. Ínima in in na cuití va xini a ña cáhvi ini in in na. Quiahva

já ín ri xihín Ndióxi va. In túhún ínima yii mé á xíni ndíá cáhvi ini a. ¹² Nasahan Ndióxi ínima yii mé á nu yo ta co cúú á tátuhun ínima ñayivi ñuyiví. Ta nacaja mé á ña ná candaá ini ndaja ín ña náhnu sáhan mé á nu yo. ¹³ Ta tá cáhan nde sahá ña yóho, cáhan nde tá quiahva najánaha ínima yii Ndióxi nuú nde. Ta co cáhan nde ña xihín tuhun ndíchí nacatiahva nde ñuyiví yóho. Quiahva já ndícani nde ñaha Ndióxi xihín na ñuhu ínima yii Ndióxi ini.

¹⁴ Tóco ndihi ña yóho cúú á ña tóntó ndivaha nuú ñayivi, na co ñuhu ínima yii Ndióxi ini. Co ndíquehe vaha na ña ta ni a cúú candaá ini na ndaja ín a jáchi na ñuhu ínima yii Ndióxi ini, na cán cúú ndusa na candaá ini ñaha Ndióxi. ¹⁵ Joo na ñuhu ínima yii Ndióxi ini, na cán cúú na candaá ini ndá ñaha cúú ña vaha ta ndá ñaha co cúú toho ña vaha. Ta xihín ña yóho cátóntó ñayivi ñuyiví jáchi co candaá ini na ña cúú cuéntá Ndióxi. ¹⁶ Jáchi cáchi tuhun Ndióxi: “Ni in túhún ñayivi a cúú candaá ini na ña cáhvi ini Ndióxi, xitoho í. Ta ni in túhún na a cúú cachi xihín mé á ña ndítahan nu á caja”, cáchi tuhun Ndióxi. Joo mí, na cúú cuéntá Jesús, cáhvi ini tá quiahva cáhvi ini Jesucristo jáchi ñuhu ínima yii Ndióxi ini mí, na cúú cuéntá mé á.

3

Na cája chúun cuéntá Ndióxi

¹ Candehé ndó, ñani i, na cúú cuéntá Jesús. Coó nacuu cahan i xihín ndo tá quiahva cahan i xihín na nachutú ndaa xihín ínima yii Ndióxi. Jáchi mé ndó cúú ndó tátuhun lee loho ña chíchi jáchi a ñaha cuahnu ndó xihín tuhun Ndióxi jáchi cája ndó ña xíca ini yiquí cuñu ndó caja tá quiahva cája ñayivi ñuyiví. ² Sahá ña cán queá tá najánaha i tuhun Ndióxi nu ndo, coó nacuu jánaha i ña ihvi chága nu ndo jáchi a cúú candaá ini ndó ña. Ña nacaja i xihín ndo queá nasahan i tátuhun leche nu ndo

jáchĭ cúú ndó tátuhun ña valí chíhí sahá ña a cuú cuxu ndó ñaha veē. Ta janda viti cō ín tiahva ndó jácuaha ndó ña ihvi chága cuéntá tuhun Ndióxi. ³ Jáchĭ cúú yĭi va ndó tátuhun ñayivi ñuyíví. Ndaja táhan mé ndó cáhĭhvi ini xĭhĭn táhan ndó ta cáni táhan ndó ta sáhndá java táhan ndó. Ta xĭhĭn ña yóho cája ndó ña cúni mé cuití ndo tá quiahva cája ñayivi ñuyíví. ⁴ Java ndó cáhí ndo ña cúú ndó cuéntá yehe, da cúú Pablo. Ta java ndó cáhí ndo ña cúú ndó cuéntá Apolos. Ta xĭhĭn ña yóho sáhndá java táhan ndó ta náha ndó ña cája ndó tá quiahva cája ñayivi ñuyíví.

⁵ Ndá da cúú Apolos xĭhĭn yehe ña ná cani táhan ndó sahá nde. Cō ndítahan caja ndó já jáchĭ mé nde cúú nde da xíca nuu cája chúun cuéntá Jesucristo, xitoho í cuití va. Ta sahá chuun cája nde yóho ñacuu ñacandúsa ndó mé á. Ta ña yóho cúú chuun ñanaha Jesucristo, xitoho í nuú yehe xĭhĭn nū Apolos caja nde. ⁶ Ña ñacaja nde cúú á tátuhun ña cája na tá xútu na. Ta yehe cúú ũ tátuhun da ñachĭhin tata jáchĭ ñacaxi tuhun ĭ tuhun Ndióxi nū ndo. Ta Apolos cúú dá tátuhun da ñaxojo ticuĭí nuú a cán jáchĭ ñajánaha chága da tuhun Ndióxi nū ndo. Joo Ndióxi quéa ñacaja ña ná cuahnu a jáchĭ cája mé á ña ná cuu cuahnu ndó xĭhĭn tuhun mé á. ⁷ Sahá ña cán quéa vatí yehe cúú ũ da ñaxutu ta Apolos cúú dá da ñaxojo ticuĭí joo ni in túhún nde cōo saha. Cáhnu cúú Ndióxi jáchĭ mé á quéa ñacaja ña ná cuahnu mé tata ñaxutu nde cán. ⁸ Xíní ñúhú candaā ini ndó ña in cúú va ña chíhin tata xĭhĭn ña xójo ticuĭí nū á. Ta tá in tá in chuun ñacaja in in ña cán quehe na yahvi saha. ⁹ Yehe xĭhĭn Apolos in cúú nde cája chúun nde cuéntá Ndióxi. Ta mé ndó cúú ndó tátuhun in yójo nuú ñasacu Ndióxi ndehe caja chúun nde cuéntá mé á.

Ta jári cúú ndó tátuhun in vehe ña cávaha Ndióxi. ¹⁰ Ta yehe cúú ũ tátuhun da cávaha mé vehe yóho. Ta mé

Ndióxi queá nasahan ñamaní nuú i ña ná taán i yuu ndúhu sahá ta ná jácava sahá i ña. Ta inga na xíní ñúhú caja chúun xihín á. Joo ndítahan candehé vaha na ndaja caja na chuun yóho. ¹¹ Jáchí in túhún Jesucristo cúú á tátuhun yuu ndúhu sahá vehe yóho. Ta ni in na a cúu tavá xóo na ña ta já cacu na inga ñaha. ¹² Mé na cávaha vehe nuú yuu ndúhu yóho cuu jáxinu na ña xihín jiuhun cuáán ta cuu caja na ña xihín jiuhun cúxú ta cuu caja ri na ña xihín yuu ñúchí. Ta jári cuu caja na ña xihín yító ta cuu caja ri na ña xihín xehé ndíyoho ta janda xihín toñámá cuu caja na ña. ¹³ Joo vaxi quivi quixi tucu Jesucristo coto ndojó mé á chuun nacaja in in ñayivi cuéntá mé á. Cacuu a tátuhun coto ndojó a ña xihín ñuhú cáyi já queá ná nahá nu á, á ndihi sahá, á cõ ndíhi sahá. Ta xihín ña yóho nahá nu á, á vaha nacaja chúun ñayivi cuéntá mé á, á a váha toho nacaja na. ¹⁴ Ta tá cõ nandíhi sahá ña nacaja na cán já queá चाहvi Ndióxi na sahá chuun nacaja na. ¹⁵ Joo tá ná cayi ña nacavaha na cán já ndíhi sahá tóco ndíhi chuun nacaja na vatí mé ná cacu ndaa ínima ná. Ta ña yóho cacuu a tátuhun tá jácacu in dataa mé dá tá quéta da ini in vehe tá cáyi a xihín ñúhu ita.

¹⁶ Á cõ xíní ndó ña cúú ndó tátuhun veñuhu Ndióxi tá ndacaan ínima yii mé á ini ínima in in ndó. ¹⁷ Ta ndá na ná jándíhi na sahá veñuhu Ndióxi yóho já queá jándíhi Ndióxi sahá na cán. Jáchí yii ndivaha veñuhu Ndióxi. Ta mé ndó cúú ndó tátuhun veñuhu Ndióxi cáhan i saha jan.

¹⁸ Candehé ndõ. Ndá ndó cáhan ña cúú ndó na ndíchí jiní sahá ña xíní ndó ñaha ñuyíví yóho, xíní ñúhú candaa ini ndó ña cúú á tátuhun jándahvi ndó mé ndó. Xíní ñúhú ndaja ndó mé ndó tátuhun na cõ xíní já queá ná nuná nu Ndióxi jánahá nu ndõ ndáa cúú ndusa na ndíchí jiní. ¹⁹ Jáchí ña ndíchí quíxi jiní ñayivi ñuyíví cúú á ña tóntó ndivaha nu Ndióxi. Já cáchí tuhun Ndióxi já: “Ña cája

mé á queá ná cachihin saha ná xihín ña ndíchí quíxi jini mé va na.”²⁰ Quiahva já cáchí ri tuhun Ndióxi: “Cándaá cáxi ini Ndióxi ña coó sahá ña cáhvi jini na ndíchí ndúu ñuyívi yóho”, já cáchí tuhun Ndióxi.²¹ Sahá ña cán queá ni in túhún ñayivi co ndítahan ndiñehe jícó na mé ná sahá ña tiaha in ñayivi ñuyívi yóho cája na. Xíní ñúhú ndicuhun ini ndó ña nasahan Ndióxi tóco ndihi ñaha nu ndo.²² Nandiquiahva mé á ndehe, da cúu Pablo xihin Apolos xihin Pedro nu mé ndó já ná cuu jánaha nde tuhun Ndióxi nu ndo. Nasahan mé á ñuyívi yóho nu ndo já ná cuu catacu ndó. Ta nasacu ini mé á quívi quivi ndó ta já tandaa quívi cuhun ndó coo ndó xihin mé á. Tóco ndihi ña yóho nasahan Ndióxi nu ndo.²³ Ta mé ndó cúu ndó cuéntá Jesucristo ta Jesucristo cúu á cuéntá Ndióxi.

4

Ndicani Pablo ndaja ún chuun cája na apóstol

¹ Co ndítahan toho ndaja cáhnu ndó ndehe. Xíní ñúhú quehe ndó cuéntá ña natahnda chuun nuú nde caja chúun nde cuéntá Jesucristo jánaha nde ña coó nasaxini ñayivi jihna, ña nasacu ini Ndióxi caja.² Ta ndá da ndiquehe in chuun, xíní ñúhú naha da ña mé a ndaa cuu candeé ini na da, ña mé a ndaa caja tá caja da chuun natahnda nu dá caja da.³ Ta cája i cuéntá nacaja vaha i chuun nasahnda Ndióxi nuú i caja i. Sahá ña cán queá co sáhní toho i mí i tá chácaan ndó cuachi jatá i. Ta co ndicani ini i tá java ga ñayivi chácaan na cuachi jatá i. Jáchi cája i cuéntá coó toho cuachi nacaja i.⁴ Tá ná cachi i xihin ndo ña coó toho cuachi nacaja i, co cúní cachi i ña mé a ndaa co ndójo ga i cuachi. Jáchi xini vaha Jesucristo, xitoho i á nacaja vaha i á coó nacaja vaha i.⁵ Sahá ña cán queá co xini ñúhú ndihi ini ndó candehé ndaa ndó ñayivi. Xíní ñúhú candati ndó janda quiahva ná quixi Jesucristo caja vií mé á sahá ñayivi

já ná ndit̄ivi ña ñúhu ínima in in ñayivi. Ta xihín ña yóho cuni tóco ndihi ñayivi ña cáhvi ini na. Anda jáví ndaja cáhnu Ndióxi ña ñajaja vaha.

⁶ Candehé ndo ñani i, ña cúu cuéntá Jesús. Sahá ña cúni nde ña ná candaa ini ndó ndía ndítahan caja ndo sahá ña cán quéa ndícani i nu ndo saha Apolos xihín saha mí i. Jáchí íin in tuhun ta cáchí a ña co ndítahan nu ndó caja cáhnu ndó in ñayivi nani quéhe núu ndó inga na. Ta xihín ña yóho cuu candaa ini ndó ña co ndítahan ndiñehe jícó ndo mé ndó sahá ña cúu ndó cuéntá in da jáchí xihín ña yóho jánuu ndáha ndó inga ña táhan nde. ⁷ Jáchí ni in ndó co cúu ndó ña náhnu chága a juú ga inga na. Xíní ñúhú candaa ini ndó ña tóco ndihi ña cómi ndo cúu á ña nasahan Ndióxi nu ndo. Sahá ña cán quéa co ndítahan caja cáhnu ndó mé ndó sahá ña ñañehe táhvi ndo nu Ndióxi.

⁸ Cáhán ndo ña ni in ñaha co ndímaní nu ndo joo co cúu á ña ndaa. Cáhán ndo ña cúu ndó ña cuicá joo co cúu á ña ndaa. Ta cáhán ndo cúu ndó ña cómi cuéntá sahá ñayivi joo co cúu á ña ndaa. Cája ndó tátuhun co xíní ñúhú toho ndó ndehe. Vá ná cacomí ndusa ndó cuéntá sahá ñayivi já ná cacomí ri ndehe va cuéntá saha ná xihín ndo. ⁹ Cúu á tátuhun nasacu Ndióxi ndehe, ña cúu apóstol janda nu ndíhí. Cúu nde tátuhun ña ndícuíta yíco cuhun quivi. Ta janda joho sándehe ñayivi ñuyíví ndehe ta sácu ndaa na ndehe. Ta janda mé tátō Ndióxi sándehe ña ndehe cuahan nde. ¹⁰ Sahá ña quíhvi ini nde Jesucristo cúu nde tátuhun ñayivi tóntó ndivaha nuú ñayivi ñuyíví. Joo mé ndó ñandaja ndó mé ndó tátuhun ña xíní ndivaha saha mé á. Mé nde cúu nde tátuhun ñayivi vitá nuú ñayivi ñuyíví joo cája ndó tátuhun ña ndacú ini. Ndája cáhnu ñayivi ñuyíví mé ndó nani quéhe núu na ndehe. ¹¹ Ta janda viti ndóho tá ndóho ini nde. Java tañu coo ña cuxu nde ta coo

ticuif coho nde ta ni jáhma candixi nde coó. Ta janda joho cája xíxi ñayivi xihín nde. Ta ni vehe nde coó. ¹² Ta a juú quiahva ndúcú ndéé nde cája chúun nde catacu nde. Ta tá chícaan ñayivi cuachi jatá nde já xíca tahví nde nu Ndióxi ña ná caja mé á ñamani xihín ná. Ta cája ndeé ini nde tá cája xíxi na xihín nde. ¹³ Ta vitá cáhan nde tá ndúcú ñehe nde tuhun nuú ñayivi vatí cáhan núu na sahá nde. Mé nde cúú nde tátuhun xehe nuú ñayivi ñuyiví. Ta cája na xihín nde tá quiahva cája na xihín ñaha coó saha, ña nacandoo cuhun cuita. Ta quiahva já cája na xihín nde janda viti.

¹⁴ Xíní ñúhú candaa ini ndó ña co cáhyi i ña yóho nu ndo sahá ña cúní jácacahan i nuu ndo. Cáhyi i ña nu ndo jáchi cúú ndó tátuhun jahyi i. Ta jánaaha i ña nu ndo tá quiahva cája in dataa xihín jahyi da jáchi quíhvi ini i ndohó. ¹⁵ Jáchi vatí ná coo uxu mil ñayivi jánaaha na ndohó sahá Jesucristo joo in túhún yehe cúú tátuhun tátá ndo. Jáchi yehe cúú u da nacahan tuhun vaha sahá Jesucristo nu ndó nu cuítí ta já nacandeeé ini ndó mé á. ¹⁶ Sahá ña cán queá xíca tahví i nu ndó ña ná caja ndó tá quiahva cája i.

¹⁷ Sahá ña cán queá chindahá i Timoteo nu ndo jáchi cúú dá tátuhun jahyi maní i ta cája chúun da cuéntá Jesucristo, xitoho í xihín ndinuhu ini da. Ta jándicuhun ini da ndohó ndá quiahva cája i tañu na cúú cuéntá Jesús ta ndá quiahva jánaaha i nu ná ndijáá veñuhu nu xíca i cuahan i. ¹⁸ Java ndó nacasahá ndo cája lándá ndó jáchi cáhán ndo ña a saa ga i coto nihni i ndohó. ¹⁹ Joo yachi saa i coto nihni i ndohó tá cúní Ndióxi. Anda já candehé e, á mé a ndaa ín ndée Ndióxi ini na xíca cája lándá jan á yúhu uun na cáhan na. ²⁰ Tá mé a ndaa cómí Ndióxi cuéntá sahá in ñayivi já queá ín ndée mé á ini na caja na ña cúní mé á. Ta coó saha toho a á tiahva ndivaha na cahan na. ²¹ Ta viti cachi ndó xihín i ndía queá catóó chága ndo. Á catóó chága ndo ña ná saa i jánani i ndohó sahá ña cája ndó ña

núu. Á cátoó chága ndó ña ná saa i ta vií vií çahan i xihin ndo jáchi najándacoo ndó ña núu cája ndó. Ndía cúní ndó.

5

Cáhan Pablo sahá in da ín xihin náná queén da

¹ Sa ñañehé e tuhun ña ín in da cúú cuéntá Jesús tañu ndó jan ta ín da xihín náná queén da. Ta ña yóho cúú á in cuachi cáhnu ndivaha. Ta ni ñayivi ñuyiví co cája ña yóho. ² Ta vatí ín cuachi cáhnu yóho tañu ndó joo caa ga ri ndóhó cája cáhnu ndó mé ndó. Xíní ñúhú cacuéha ini ndó sahá ña yóho. Ta xíní ñúhú tavá ndó da cája cuachi yóho tañu ndó jan. ³ Vatí co ín i xihín ndo jan joo ndícani ndivaha ini i sahá ña cúú jan. Ta cúú á tátuhun ín i xihín ndó jan ña cán queá sa nasacu ini i ña xíní ñúhú caja ndó xihín da cája cuachi jan. ⁴ Játaca táhan ndihi ndó na cúú cuéntá Jesucristo, xitoho í. Ta mé a cán quiahva ndée á nu ndo caja ndó ña cúní mé á. Ta cacuu a tátuhun coo i xihín ndó jan. ⁵ Anda já xíní ñúhú ndiquiahva ndó da jan ndáha tiñáhá sacuahá já ná jándoho rí ini yiquí cuñu da viti ta já ná cuu çacu ndaa ínimá dá tá ná xinu coo quiví quixi tucu Jesucristo.

⁶ Co ndítahan caja lándá ndo sahá ña cája ndó. Xíní ñúhú ndicuhun ini ndó in tuhun ña cáchí já: “Chá cuití yúsá naxaa játiví ndihi a java yúsá ña ín vaha.” ⁷ Xíní ñúhú tavá ndo da jan tañu ndó jáchi cúú dá tátuhun yusá naxaa, ña játiví ña ín vaha. Ta xihín ña yóho quee ña núu veñuhu nu táca ndó jan jáchi sahá da jan cuu caquini inga na ta caja na cuachi. Xíní ñúhú canduu vií ndo tátuhun mé pan xíxi na vicó pascua jáchi coó yusá naxaa ñúhu xihín á. Ta Jesucristo nasacuu a tátuhun in ndicachi, rí najoco na nu Ndióxi vicó pascua sahá cuachi ñayivi jáchi naxihí a ndica crúxu sahá cuachí já ná cuu çacu ndaa ínimá yo. ⁸ Sahá ña cán queá ndítahan cajii iní sahá ña

naçaja Jesucristo. Xíní ñúhú jándacoo í ña núu sa naçaja í jihna, ña cúu tátuhun pan naçaa. Ta xíní ñúhú caja í ña ndaa xihín ndinuhu iní. Ta ña yóho cúu á tátuhun pan ña coó nacava táhan yusá naçaa xihín.

⁹ Nu carta nachindahá i nu ndó jihna ga, naçachi i xihín ndo ña ná a catáhan ndó xihín ñayivi, na ndúu xihín na co cúu yíi ná á ñájíhi na. ¹⁰ Tá naçachi i ña yóho xihín ndo co cúni cachi a ña xíní ñúhú tavá xóo ndó mé ndó chí in ndeé nuú ñayivi ñuyíví yóho jáchi a cuú quee ndó ñuyíví yóho cuhun ndo. Ta mé a ndaa ndúu cuahá na ñuyíví yóho cája na cuahá cuachi xihín yiquí cuñu na ta catóo ndivaha na jjuhún ta cája cuíhná na ta cája cáhnu na yoco. ¹¹ Ña cúni cachi i xihín ndo quea co ndítahan catáhan ndó xihín na cáchi cúu cuéntá Jesús nani cája na ña núu xihín yiquí cuñu na, á tá cúu ná na catóo ndivaha jjuhún, á tá cúu ná na cája cáhnu yoco, á tá cúu ná na tuhún, á tá cúu ná na xíhi, á tá cúu ná na cuíhná. Ta ni a cacoo ndó cuxu ndó xihín ná tá cája na ña yóho. ¹² Co cáhan i sahá ñayivi ñuyíví jáchi co ndítahan nuú i caja víi i saha ná. Joo ndítahan nu ndó candehé ndo ndaja cája na cúu cuéntá Jesús ndúu tañu ndó jan. ¹³ Jáchi mé Ndióxi quea caja víi a sahá cuachi ñayivi ñuyíví. Ña cán quea ndítahan nu ndó tavá ndó da cája cuachi tañu ndó jan.

6

Tá sácú saha táhan na cúu cuéntá Jesús nuú na jutixia

¹ Tá co táhan ini ndó xihín ña cája ñani ndó, na cúu cuéntá Jesús co ndítahan nu ndó cuhun ndó cacu ndó saha ná nuú na jutixia, na co cúu cuéntá Jesús. Ña ndítahan caja ndó quea cahan ndó xihín mé na cúu cuéntá Jesús ña ná caja víi na sahá ña co táhan ini ndó xihín jan. ² Á co xíni ndó tandaa quívi caja víi na cúu cuéntá Jesús saha tóco ndihi ñayivi ñuyíví. Ta tá mé ndó cacuu ndó na caja

vií saha tóco ndihi ñayivi ñuyívi, ndá cuéntá queá cō cūni ndó caja vií ndó sahá ña válí cúu tañu mé ndó jan. ³ Ña xíní ñúhú caja ndó queá nducú ndo caja vií ndo sahá ña cúu tañu ndó jan. Jáchí xíní ñúhú ndicuhun ini ndó ña janda tátō Ndióxi caja vií yo saha. ⁴ Sahá ña cán queá tá cáni táhan ndó sahá ñaha válí ñuyívi yóho cō xíní ñúhú toho cuhun ndó cavií saha ndó nuú na cō cúu cuéntá Jesús. ⁵ Candehé ndó. Cáhan i ña yóho xihín ndo já ná cacahan nuu ndo. Á cō iin in da tácu ini tañu ndó jan ña ná caja vií da saha ndó, vaha. Xíní ñúhú ndindita in da tácu ini já ná cuu caja vií da sahá ña cúu tañu ndó jan. ⁶ Joo ña cája ndó queá cáni táhan ndaja táhan mé ndó ta já ndáca táhan ndó cuahan ndó cavií saha ndó nuú na cō cúu cuéntá Jesús. Cō ndítahan toho caja ndó já.

⁷ Sa cuachi cáhnu ndivaha queá cája ndó tá cáni táhan ndaja táhan mé ndó jan. Vaha ná caja ndeé ini ndó tá cō cája vaha in na xihín ndo. Vaha ná caja ndeé ini ndó tá ná caja cuihná na ñaha ndó. Jáchí cō ndítahan cacu saha táhan ndó nuú na cō cúu cuéntá Jesús. ⁸ Joo ña cája ndó queá ña núu xihín ñani táhan ndó ta janda cája cuihná ndo ñaha ñani ndó, na cúu cuéntá Jesús.

⁹ Xíní ñúhú candaa ini ndó ña cōó saha toho ñayivi cája ña núu jan cuhun na nuú cacomí Ndióxi cuéntá saha ná. A jándahvi ndó mé ndó jáchí na ndúu xihín na cō cúu yí ná á ñájíhí na a cuhun toho na nuú cacomí Ndióxi cuéntá saha ná. Ta ni na cája cáhnu yoco ni na ndúu xihín yí á ñájíhí inga na ta ni da cúu taa líhi a cuhun toho na nu Ndióxi. ¹⁰ Ta ni na cuihná ta ni na cátóó ndivaha jjuhún ta ni na xíhí ta ni na ndahnda yúhu ta ni na jándahvi ñahá ta ni in táhan na yóho a cuhun toho na nuú cacomí Ndióxi cuéntá saha ná. ¹¹ Ta táhan na yóho nasacuu ri java ndóhó va, nduu. Joo viti sa nandaja vií Ndióxi ndohó ta nacaxi a ndohó cacuu ndó cuéntá mé á. Nanduu ndó ñayivi ndaa

nu Ndióxi sahá ña ñacaja Jesucristo, xitoho í ta sahá ña cája ínima yji Ndióxi.

Xíni ñúhú candaa í yiquí cuñu í jáchi cúu á ña yji

¹² Ndúu java ñayivi ta cáchí na ña núná nu ná caja na ña cúní mé va na. Vatí mé a ndaa núná nu ná caja na ña cúní mé ná joo xíni ñúhú candehé na á vaha, á a váha ña cája na. Jáchi mé a ndaa núná nu yo caja í ña cúní mí joo co ndítahan quiahva í ñamaní ña ná cahnu ña núu yiquí cuñu í. ¹³ Ta cáchí na ña ín tixi yó sahá ña cán quea xíni ñúhú cuxú. Ta cáchí na ña xíni ñúhú cuxú jáchi ín tixí. Joo vaxi quivi jándihi Ndióxi saha ndívi ña yóho. Ta coo nasahan Ndióxi yiquí cuñu í nu yo ña ná caja í cuachi xihín á tátuhun ña ná coo í xihín na co cúu ñájíhí yo á yí yo. Nasahan Ndióxi yiquí cuñu í nu yo já ná caja í ña cúní mé á. Ta ñacaja mé á ña ná cacomí a cuénta saha yo. ¹⁴ Ta tá quiahva ñacaja Ndióxi najánditacu a Jesucristo, xitoho í quiahva já caja ri a jánditacu a yiquí cuñu í xihín ndée mé á.

¹⁵ Xíni ñúhú candaa ini ndó ña in cúu ndó xihín Jesucristo. Ta tá cuahan ndó cája ndó cuachi xihín najihí xíca jii, cúu á tátuhun ñéhe ndó Jesucristo cuahan cája ña núu. Co ndítahan caja ndó já. ¹⁶ Sa xíni vaha ndó ña tá quíhvi nuu in dataa xihín najihí xíca jii já quea ndúu na tátuhun in víxí ñayivi. Jáchi cáchí tuhun Ndióxi já: “Tá ná ndique táhan in dataa xihín in ñáñáha já quea ndúu na tátuhun in víxí ñayivi.” ¹⁷ Ndá na ndiquiahva mé ndáha Jesucristo, xitoho í já quea in ndúu na xihín mé á jáchi ñúhu ínima yji Ndióxi ini na.

¹⁸ Cama caxoo ndó nu tóco ndihi ña núu xíca ini yiquí cuñu ndó caja. Co ndítahan coo ndó xihín na co cúu ñájíhí ndo á yí ndo jáchi ni in túhún toho cuachi co cája quini nahá xihín yiquí cuñu ñayivi tátuhun cuachi yóho. Jáchi ndá na ín xihín na co cúu yí ná á ñájíhí na já quea cája

na cuachi nuú yiquí cuñu mé va na. ¹⁹ Xíní ñúhú ndicuhun ini ndó ña mé yiquí cuñu ndó jan cúú á tátuhun in veñuhu nu ndácaan ínima yíi Ndióxi, mé a nasahan Ndióxi nu ndo. Ta viti yiquí cuñu ndó a juú ñaha mé ndó cúú á jáchi cúú á ñaha Ndióxi. ²⁰ Jáchi yahvi ndivaha nachahvi Ndióxi saha ndo tá naxihí Jesucristo ndica crúxu. Saha ña cán quea ndítahan caja cáhnu ndó Ndióxi xihín yiquí cuñu ndó ta jári xihín ínima ndo jáchi ndíví a cúú á cuéntá Ndióxi.

7

Tá tandaha ñayivi

¹ Ta viti cúní nducú ñehé e tuhun nu ndo sahá ña nandaca tuhún ndó yehe nu carta nachindahá ndó nuú i. Cáchí i xihín ndó sahá da cámani tandaha ña vaha caja da tá ná coo tacú da. ² Joo sahá cuachi caja ñayivi tá ndúu na xihín na coo cúú ñájíhí na á yíi ná sahá ña cán quea vaha chága ná tandaha ná já ná coo ñájíhí in in ta ta jári najihí va ná coo yíi in in na. ³ Ta in dataa ndítahan ndiquiahva da mé dá nu ñájíhí da ta jári ñáñáha ndítahan ndiquiahva ña mé ña nu yíi ña jáchi quiahva já sáhndá a coo a. ⁴ Jáchi in ñáñáha, ña natandaha coo cómí ga ña cuéntá saha mé ña jáchi yíi ña cúú da cómí cuéntá saha yiquí cuñu ña. Ta ni in dataa, da natandaha coo cómí ga da cuéntá sahá yiquí cuñu da. Ñájíhí da cúú ña cómí cuéntá sahá yiquí cuñu da. ⁵ Saha ña cán quea ndítahan ndiquiahva nu táhan ndó ta a cándají táhan ndó. Ta tá coo cúní ndó cuju xítahan ndó xíní ñúhú cacuu a sahá ña sa najándique táhan tuhun ndó ña a cúju xítahan ndo sahá ña cúní ndó caça tahví ndó nu Ndióxi chá tiempo. Joo tá nandihí xíní ñúhú ndique táhan tucu ndó jáchi tiaha náa jácahan Satanás, mé tiñáha sacuahá ndohó ña ná caja ndó cuachi sahá ña a cuú cahnu ndó nuú ña xíca ini yiquí cuñu ndó caja.

⁶ Tóco ndihi ña cahan i xihin ndo yoho co cuni cachi a ña xini ñuhu tandaha ndo vati cuu tandaha ndo ta cuni ndo. ⁷ Vati me a ndaa caji ini i ta na canduu tacu ndihi ndo tatuhun yehe. Joo sa jin sa jin naja Ndióxi xihin in in í. Java na ñehe táhvi ná tandaha na ta java na ñehe táhvi na canduu tacu na.

⁸ Ndá na nduu tacu xihin ndá na nduu cuaan, ña vaha chaga quea ná a tandaha ná ta ná canduu na tátuhun yehe. ⁹ Joo tá co ndeé ini na canu na yiqui cuñu na, vaha chaga ná tandaha ná jachi vaha chaga ná tandaha ñayivi a juu ga ña ná ndiava ini na coo na xihin na co cúu yí ná á ñájihi na.

¹⁰ Ta nu ndóhó, na sa in yí á ñájihi, sáhdá i chuun nu ndó ña ná a jándacoo táhan ndó. Ta ña sáhdá i nu ndo yoho co cúu á ña naquixi jini mí i. Cúu á ña sáhdá Ndióxi caja ndó. Co ndítahan nu in ñáñaha jándacoo ña yí ña. ¹¹ Ta tá ná jándacoo ña da, co ndítahan nu ña tandaha ña xihin inga da. Á tá coo ta ña ndítahan caja ña quea ndique táhan mani tucu ña xihin yí ña. Ta jari in dataa co ndítahan nu dá jándacoo da ñájihi da.

¹² In java ga ñaha cuni cahan i xihin ndo. Mí i cahan i ña vaha caja ndó ña vati me a ndaa co cúu á ña nasahnda Ndióxi nuú i jaha i nu ndo. Ta ña yoho quea ña cahan xihin ndo: Tá in in da cúu cuénta Jesús ta in ñájihi da, ña co cúu cuénta Jesús. Ta tá caji ini ña coo ña xihin dá já quea co ndítahan nu dá jándacoo da ña. ¹³ Ta tá in in ña cúu cuénta Jesús ta in yí ña, da co cúu cuénta Jesús. Ta tá caji ini da coo da xihin ña já quea co ndítahan jándacoo ña da. ¹⁴ Jachi caja yí Ndióxi in dataa sahá ña in da xihin ñájihi da, ña cúu cuénta Jesús. Ta jari caja yí Ndióxi in ñáñaha sahá ña in ná xihin yí ña, da cúu cuénta Jesús. Jari caja yí Ndióxi jahyi na yoho ná a cacuu na tátuhun na co xini Ndióxi. Ta xihin ña yoho cuu candaa ini na ndaja

íin íchi cuéntá Jesús. ¹⁵ Joo tá cúni yíi ndo á ñájíhí ndo, na co cúu cuéntá Jesús jan, quee na cūhun na já quéa quiahva ndó ñamaní nu ná caja na ña. Jáchi co ndítahan nu ndó caja ndúsa ndó xihín na co xíni Ndióxi cán ña ná coo na xihín ndo. Jáchi cúni Ndióxi ña ná canduu vií ndo. ¹⁶ Ta ni co xíni ndo á ndiquehe yíi ndó á ñájíhí ndo íchi cuéntá Jesús, á a ndiquehe na ña.

¹⁷ Ta cáxi tūhun i nu tóco ndihi na cúu cuéntá Jesús ndúu ndijáá veñuhu ña ndítahan coo na tá quiahva ñasahjin na tá nandihvi na íchi cuéntá Jesús jáchi quiahva já cúni Ndióxi. ¹⁸ Ta tá naquihvi ndó íchi cuéntá Jesús ta sa ndácaan marca yiquí cuñu ndó coo caja toho a. Joo tá coo marca jan yiquí cuñu ndó co ndítahan chícaan ndó ña yiquí cuñu ndó. ¹⁹ Jáchi coo caja toho a á íin marca yiquí cuñu ndó á coo a. Ña cúni Ndióxi quéa ná caja ndó ña sáhndá mé á nu ndo caja ndó xihín ndinuhu ini ndó. ²⁰ Ta ndítahan coo ndó tá quiahva ñasahjin ndó tá nandiquehe ndó íchi cuéntá Jesús. ²¹ Ta tá nasacuu ndó na naxeen xitoho ndó caja chúun ndó tá nandiquehe ndó íchi cuéntá Jesús já quéa co ndítahan ndicani ini ndó sahá. Joo tá ná quiahva xitoho ndó íchi nu ndó ña ná quee ndó cūhun ndo já quéa caja ndó ña. ²² Jáchi da cúu cuéntá Jesús cúu dá da najani Ndióxi nuú cuachi da vatí cándoo da cája chúun da cuéntá xitoho da, da naxeen ñahá. Ta da naxica núná mé tá nandiquehe da íchi cuéntá Jesús cúu dá mozo cuéntá Jesucristo. ²³ Jáchi yahvi ndivaha nachahvi Ndióxi saha ndo tá naxihi Jesucristo ndica crúxu ña ná cacomí a cuéntá saha ndo. Saha ña cán quéa a ndiquiahva toho ndó mé ndó ndáha ñayivi ña ná cahnu na ndohó. ²⁴ Candehé ndo ñani mí i, na cúu cuéntá Jesús. Ndítahan coo ndó tá quiahva ñasahjin ndó tá nacana Ndióxi ndohó cacuu ndó cuéntá mé á jáchi íin mé á xihín ndo.

²⁵ Ta viti cúni cahan i sahá na tacú, na cámani tandaha.

Coo n̄acachi toho Ndióxi xihín i sahá ña yóho ña cán queá cahan i ña cáhvi ini mí i sahá. Ta cuu candúsa ndó ña cahan i xihín ndo jáchi n̄acaja Ndióxi ñamaní xihín i ña cúu u in da tácu ini. ²⁶ Ta cahan i ña ndítahan coo tacú in dataa jáchi ihvi ndivaha cáa tiempo ndúú viti. ²⁷ Joo tá iin ñájíhí ndo, a jándacoo ndó ña. Ta tá coo ñájíhí ndo, a ndúcú ndó ña. ²⁸ Joo a juú cuachi queá cája ndó tá ná tandaha ndo. Ta ni a juú cuachi queá cája in ña tacú tá ná tandaha ña. Joo mé a ndaa ná cahan i xihín ndo, yáncá a tá ná tandaha ñayivi jáchi cuahá ndivaha ndoho ini na. Ta co cúní ña ná ndoho ini ndó já sahá ña cán queá cahan i ña yóho xihín ndo.

²⁹ Candehé ndo ñani i, na cúu cuéntá Jesús. Ña cúní cachi i cúu ña yóho: Sa n̄acayati tiempo quixi Jesucristo. Sahá ña cán queá na iin ñájíhí xíní ñúhú ndíhi ini na caha chúun na cuéntá mé á tá quiahva cája chúun na tacú cuéntá mé á. ³⁰ Ta ndá na ndúu cuéha ndivaha ndítahan caha na tátuhun na cájii ini. Ta na cájii ini ndítahan caha na tátuhun na ndúu cuéha ndivaha ini. Ta na xéen ñaha ñuyíví yóho ndítahan caha na tátuhun naxeen na ña co cúu ñaha na. ³¹ Ta na cómí ñaha ñuyíví yóho, xíní ñúhú ndindójó na sahá ñaha cán. Jáchi vaxi quivi ndíhi saha ñuyíví yóho xihín tóco ndíhi ñaha iin nu á.

³² Ña cúní yehe queá ña ná a ndícani nahá ini ndó sahá ñaha ñuyíví yóho. Jáchi tá camani tandaha in dataa já queá núná nu dá caha chúun da cuéntá Ndióxi xihín ndinuhu ini da. Ta ndúcú da ndá quiahva caha da ña cájii ini Ndióxi xihín. ³³ Joo da sa natandaha ndítahan caha chúun da ñuyíví yóho já ná cana ña cuxu na vehe da. Ta cája da ña cájii ini ñájíhí da xihín. ³⁴ In da natandaha co xíní da ndíá ndíhi chága ini da saha, á Ndióxi á ñájíhí da. Ta jári najíhí tá cúu ná na tacú ndíhi ini na caha na ña cúní Ndióxi jáchi ndíquiahva na mé ná ndáha Ndióxi ña

ná cacomí a cuéntá saha yiquí cuñu na ta sahá ínima ná. Joo najihí ndúu yí ndíhi ini na sahá chuun vehe na jáchi cúni na ña ná tahan ini yí ná xihín ná.

³⁵ Cahan i ña yóho xihín ndo jáchi cúni chindeé e ndohó ta co cahan i ña sahá ña co cúni ña ná tandaha ndo. Ña cúni queá ná nuná nu ndó caja chúun ndó cuéntá Ndióxi xihín ndinuhu ini ndó ta ná a cáji nuu ni in ñaha nu ndó caja ndó ña cúni Ndióxi.

³⁶ Ta ndá da iin jahyi jhí ta cahan da ña ndítahan tandaha ña jáchi sa cuahá cuia ña já cuu quiahva da ña ña ná tandaha ña tá cúni da. A juú toho cuachi cúu ña yóho.

³⁷ Ta tá cahan ndo ña co ndítahan toho tandaha jahyi ndó ta cahan ndo ña cáji ini ná ña coo mé ná já queá vaha va cája ndó tá co cája ndúsa ndó xihín ña ná tandaha ña.

³⁸ Vaha cája in dataa tá sahan da ñamani nuú jahyi jhí da ña ná tandaha ña. Joo vaha chága cája da tá co cája ndúsa dá xihín ña ña ná tandaha ña.

³⁹ Ta a cuú tandaha in ñañaha xihín inga dataa nani tácu yí ña. Joo tá naxihí yí ña já queá candoo núna nu ña tandaha tucu ña. Joo ndítahan tandaha ña xihín da cúu cuéntá Jesús. ⁴⁰ Vatí cahan i ña cajii chága ini ná tá ná a tandaha tucu ña. Ña yóho queá cáhvi ini i sahá ña yóho. Ta ínima yii Ndióxi queá jácahan yehé cáchí i ña yóho xihín ndo.

8

Cahan Pablo sahá ña najoco ñayivi nuú yoco

¹ Ta viti cúni ndicani i nu ndo sahá ña ndítahan caja ndó xihín ña najoco na nuú yoco. Vatí cúu á ña ndaa tá cáchí java na ña xini vaha na sahá ña yóho joo tá cahan yo cúu yó na xini vaha já queá casáha yo ndínehe jícó yo mí. Joo tá quíhvi iní ñani táhan í já ndindacú chága yó xihín ñaha Ndióxi. ² Tá ndúu java na tañu ndó ta cahan na ña sa xini

na ndaja táhan ñaha, na yóho náha ña cámani cándaã ini na ña ndítahan candaa ini na. ³ Jáchi mé a ndaa xini vaha Ndióxi ndá na cúu na quíhvi ini mé á.

⁴ Ta viti cáhan i xihin ndo sahá ña najoco na nuú yoco. Cándaa cáxi ini ña coo a cúu toho yoco ndúu ñuyívi. Ta cándaã cáxi ini ña in tálaá Ndióxi cúu ndusa Ndióxi. ⁵ Vatí cáchi ñayivi ña ndúu cuahá ndiόxi ta ndúu cuahá xitoho indivi xihín ñuyívi ⁶ joo mí cándaã vaha ini ña íin in túhún Ndióxi, mé a cúu tátá yo. Ta mé á quea nacavaha tóco ndihi ñaha. Ta nacavaha mé á mí ña ná caja cáhnu í mé á. Ta íin in túhún xitoho í ña cúu Jesucristo. Ta mé á quea cája ña ná coo tóco ndihi ñaha ta cája ña ná catacu mí viti.

⁷ Joo a juú tóco ndihi na cúu cuéntá Jesús xini ña yóho. Jáchi java táhan na sa cája cáhnu yoco sanahá cán tá xíxi na ña najoco ñayivi nuú yoco cáhán na ña cúu á ña najoco na nuú java ndiόxi. Ta xihín ña yóho cáhán na ña cúu ná na sa nayuxu sahá ña naxixi na ña najoco ñayivi nuú yoco. Ta co xini na á ndítahan cuxu na ña á co ndítahan cuxu na ña. ⁸ Cándehé ndo. Co ndíquehe toho Ndiόxi mí sahá ña xíxi. Jáchi co cúu yó na íin chága saha tá xíxi in ñaha. Ta ni co cúu yó na coo saha tá co xíxi ñaha. ⁹ Joo xini ñuhú candehé ndo ña ná a jándicava ndó inga na nuú cuachi sahá ña cája ndó jan. Jáchi vatí xini vaha ndó ña cuu cuxu ndó ña cán joo ndúu java na vitá cuahan íchi cuéntá Jesús. ¹⁰ Cúu á tátuhun sácco ndó cuxu ndó nu cáyahvi ña najoco na nuú yoco jáchi sa xini ndo sahá ña yóho. Ta nani íin ndó xíxi ndó jan yáha in da cúu cuéntá Jesús, da vitá xihín ñaha Ndiόxi. Ta sahá ña xini da ndohó já quíhvi da jan xíxi da xihin ndo vatí cáhán da cúu á cuachi. ¹¹ Xihín ña cája ndó jan cuu jándicava ndó da vitá xihín ñaha Ndiόxi cán nuú cuachi vatí xini vaha ndó ña co cája ndó cuachi tá ná cuxu ndó ña najoco na nuú yoco. Xini ñuhú ndicuhun ini ndó ña naxihí Jesucristo sahá da jan. ¹² Tá jándicava ndó ñani

ndó, da vitá xihín ñaha Ndióxi cán nuú cuachi já quéa cája ndó cuachi nuú Jesucristo viti. ¹³ Sahá ña cán quéa tá ná jándicava i ñani i nuú cuachi sahá ña xíxi i cuñu, ña najoco na nuú yoco cája i cuénta a cúxu ga i ña já ná a jándicava i inga da nuú cuachi.

9

Ña núná nuú in na apóstol caja

¹ Mé a ndaa yehe cúu u in apóstol cuénta Jesucristo sahá ña cán quéa núná nuú i caja i ña cája in apóstol. Jáchi mí i sa naxini i xihín nuú i Jesucristo, xitoho í. Ta mé ndó nandiquehe ndó íchi cuénta mé á sahá chuun nacaja i ta ña yóho náha ña mé a ndaa cája chúun i cuénta mé á. ² Cája i cuénta ndúu java na ta co ndiquehe na yehe tátuhun in apóstol cuénta Jesucristo. Joo ndóhó ndítahan ndiquehe ndó yehe jáchi nanduu ndó cuénta mé á sahá chuun nacaja i. Ta xihín ña yóho náha ña mé a ndaa cúu u in apóstol cuénta mé á.

³ Ta ña yóho cúu tuhun ndúcú ñehe e nuú na cáhan núu sahá i jan: ⁴ Íin sahá i ña ná coto ndó yehe. ⁵ Ta tá ná coo ñájíhí i, ña cúu cuénta Jesús íin sahá i candaca i ña caca nuu i tá quiahva cája Pedro xihín java ga na apóstol xihín ñani Jesucristo, xitoho í. ⁶ Á cáhan ndo ña in túhún yehe xihín Bernabé cúu nde da coo saha ña ná coto na cúu cuénta Jesús ndehe, vaha. ⁷ Jáchi ni in túhún toho soldado co quehe da jihún mé dá ta já xito da mé dá. Jári ndá da xútu yitó uva, cuu caxí da uva cána nu dó cán jáchi já cáni a coo a. Ta jári ndá da ndáá ndicachi cuu coho da leche ndicachi ndáá da cán jáchi já cáni a coo a. ⁸ Ta a juú cahán ndo ña cáhan i ña quíxi jiní mé cuití v i jáchi cáchí ley mé Moisés ña yóho viti. ⁹ Já cáchí a já: “A chícayun ñúnú yuhú tĩndiqui nani cája chúun rí sání rí trigo. Joo xíní ñúhú quiahvún ñamaní nu rí caxí rí a”, cáchí tuhun Ndióxi.

Joo cō ndíhi ini Ndióxi sahá tindiq̄i cuití va. ¹⁰ Saha mí ví nacahyí Moisés ña yóho ta saha mí ví cáhan ña yóho tá cáhí a já. Cúú á tátuhun cája da xútu tát̄i xihín da jáquee tát̄i jáchi ndát̄i ndíví da ndiquehe da táhan nuni cán sahá ña nacaja chúun da xihín á. ¹¹ Tá nacahan nde tuhun Ndióxi xihín ndó já cúú á tátuhun nachihin nde tata cuéntá Ndióxi ini ínima ndo. Sahá ña cán queá ndítahan nu ndo chindeé loho ndó ndehe xihín ña cómi ndo jáchi najánaha nde tuhun Ndióxi nu ndo. ¹² Ta mé a ndaa ín chága saha mé nde ña ná coto ndó ndehe a juú ga inga na.

Ta vatí ndítahan nu ndó coto ndó ndehe joo cōo nacaja ndúsa nde xihín ndo ña ná caja ndó ña. Ta cuahá tañu cája ndeé ini nde jáchi cō cún̄i nde caji nuu nde ña ná ndicuita nuu tuhun vaha sahá Jesucristo. ¹³ Mé ndó sa cándaa vaha ini ndó ña núná nuú na cája chúun ini veñuhu cuxu na ña jóco ñayivi nu Ndióxi. Ta na cája chúun nu náa Ndióxi veñuhu núná nu ná cuxu na cuñu quít̄i, rí najoco ñayivi nu Ndióxi. ¹⁴ Ta quiahva já cája chúun nde cuéntá Jesucristo, xitoho í cáhan nde tuhun vaha saha mé á. Ta nasahnda mé á chuun ña ná coto na cúú cuéntá mé á ndehe sahá chuun cája nde. ¹⁵ Joo ni in túhún tañu cōo nacaja ndúsa i xihín ndo ña ná coto ndó yehe vatí cáni nu ndó caja ndó ña. Ta ni cō cáhyí i carta yóho nu ndo já ná quiahva ndó ñaha nuú i, vaha. Jáchi mé a ndaa ín vaha ini i cáhan i tuhun Ndióxi xihín ndo ta cōo caja toho a ña ná quivi i jóco.

¹⁶ Yehe cō ndíñehe jícó i mí i sahá ña xíca nuu i cáhan i tuhun vaha sahá Jesucristo nuú ñayivi jáchi cúú á chuun ndítahan nuú i caja i. Ta ndáhví nahá nacuu u tá ná caja sáá ini i caxi tuhun i ña. ¹⁷ Tá ná cája i chuun yóho sahá ña cún̄i mí i cuití va já queá cuu quehe e yahvi sahá. Joo cō cája toho i já jáchi nacaxi Ndióxi yehe cahan i tuhun mé á sahá ña cán queá ndúsa cája i ña. ¹⁸ Ta sa mé yahvi quehe e sahá chuun cája i queá cájii ini i tá cáhan i tuhun

vaha sahá Jesús nuú ñayivi ta co cháhvi na sahá. Ta cájji ini i jáchi co cája ndúsa i xihín ndo ña ná coto ndó yehe tá quiahva cája ndó xihín java ga na cáhan tuhun Ndióxi xihín ndo.

¹⁹ Vatí mí i co cúu u mozo ñayivi joo cája chúun i mí i tátuhun mozo saha tóco ndihi ñayivi. Jáchi cáxi tuhun i tuhun vaha sahá Jesucristo nu ná ja ná cuu ndicuaḥa chága na cúu cuénta Jesús. ²⁰ Tá xíca nuu i tañu na Israel ndája i mí i tátuhun in da Israel jáchi ña cúní quea ná ndiquehe na íchi cuénta Jesús. Ña cúní cachi i quea tá ín i tañu na cája ley Moisés in cája i xihín ná vatí co ndíco i íchi cuénta ley Moisés viti. Joo cája i ña sahá ña cúní i ña ná ndiquehe na íchi cuénta Jesús. ²¹ Ta tá xíca nuu i tañu na co cája ña sáhdá ley Moisés já cája i tá quiahva cája mé ná jáchi cúní ña ná ndiquehe na íchi cuénta Jesús. Joo co cája i cuachi tá quiahva cája na cán jáchi sáhdá ley Ndióxi chuun nuú i viti ta cája i ña cúní Jesucristo cuití va. ²² Ta tá xíca nuu i tañu na vitá xihín ñaha Ndióxi já quea jánuu ndáha i mí i jáchi cúní ña ná ndindacú na xihín tuhun mé á. Ña cúní cachi i xihín ndo quea ndája i mí i tátuhun nda na nacuu va jáchi cúní quee vaha i xihín ná ja ná ndihvi na íchi cuénta Jesús ña ná cacu ndaa ínima ná. ²³ Cája i tóco ndihi ña yóho já quea ná ndicuiṭa nuu tuhun vaha cáhan sahá Jesucristo. Jáchi xihín ña yóho caha cuaha Ndióxi ñamaní xihín i.

²⁴ Candehé ndo. Sa xíní vaha ndó ña tá jáquehe táhan java ta tuhun da ña ná cunu da, mé a ndaa tóco ndihi da ndúcú ndéé da xínu da. Joo in túhún da quee vaha. Ta já quehe da ña ndítahan nu dá quehe da. Quiahva já ndítahan caha ri ndóhó va. Xíní ñúhú nducú ndo cuhun vaha ndó íchi cuénta Jesús janda quiahva ná xinu co ndó janda nu ndíhí cuíí já ná quiahva Ndióxi nu ndo ña ndítahan ndiquehe ndó. ²⁵ Tóco ndihi ñayivi tá cája tiahva

na mé ná ña ná cuh̄un n̄a cunu na, c̄o cún̄i n̄a caja na ndá ña ñacuú jách̄i ndáá n̄a mé ná. Tóco ndihi ña yóho cája na sah̄á ña cún̄i n̄a quee vaha na ña ná ñehe ná in tiyiv̄i ita sán̄ú j̄in̄i ná vat̄i cama chá ích̄i ita cán. Joo mí ndúcú ndéé ȳo cuah̄an yó ích̄i cuéntá Jesús jách̄i ña ndátí mí quiah̄va Ndióxī n̄u ȳo c̄o ndíhi sah̄a and̄a ama cáa quiv̄i. ²⁶ Joo c̄o cúú u in d̄a x̄inu cuáá. Ta ni c̄o cúú u tátuh̄un in d̄a jácana yiquí nuú tach̄i. Jách̄i ndúcú ndéé e quee vaha i já ná ndiquehe e ña quiah̄va Ndióxī nuú i. ²⁷ Ña cája i quéa cája ndúsa i x̄ih̄in yiquí cuñu i ña ná caja i ña cún̄i Ndióxī. Jách̄i a juú tiah̄va náá jándacoo Ndióxī yeh̄e vat̄i mí i cúú u d̄a najánaha tuh̄un Ndióxī nuú ñayivi.

10

Cáhan Pablo ña c̄o ndítahan caja cáhnu na yoc̄o

¹ Candehé ndo ñani i, n̄a cúú cuéntá Jesús. C̄o cún̄i ña ná ndindójó ndo ndá quiah̄va ñacaja Ndióxī sanahá x̄ih̄in tásah̄nu jícó ȳo tá ñasandaca mé á n̄a yucú ích̄i cán. Ñacaja mé á ña ná x̄inu in v̄ic̄o núhú xoo nuú cuah̄an n̄a ña ná candaca a n̄a. Ta ñachindeé a n̄a ña ná cuu cojo cava na tañuh̄u nani tañuh̄u cuáhá. ² Ta tóco ndihi n̄a cán in ñanduú ndihi na x̄ih̄in Moisés tá ñayaha na tañuh̄u nani ndáca v̄ic̄o núhú n̄a. Ñasacuú a tátuh̄un ñacandúta ná ña ná cacomí Moisés cuéntá sah̄a ná. ³ Ta tóco ndihi n̄a cán ñaxixi na ña ñachindahá Ndióxī, ña ñaquixi a n̄u ná chí indiví. ⁴ Ta quiah̄va já tóco ndihi n̄a cán ñaxihi na ticuif̄, dó ñasahan mé á n̄u ná coho na. Mé ticuif̄ cán cúú dó dó ñacana t̄ixi in tóto. Ta mé tóto cán cúú á tátuh̄un yuhú nuú Jesucristo, mé a ñasah̄in x̄ih̄in ná nani ñaxica nuu na yucú ích̄i cán. ⁵ Joo cuah̄á ndivaha táhan n̄a cán ñacaja na ña núu ña c̄o cájii ín̄i Ndióxī x̄ih̄in. Sah̄á ña cán quéa ñaxih̄i n̄a mé yucú ích̄i n̄u xica na cuah̄an n̄a cán.

⁶ Tóco ndihi ña nayaha yóho jánaha nu mí ña co ndítahan ndiava iní ña co táhán ini Ndióxi xihin tá quiahva nacaja na cán. ⁷ Saha ña cán quea coto a juú caja cáhnu ndó yoco tá quiahva nacaja java na cán jáchi já cáchi tuhun Ndióxi já: “Tóco ndihi ñayivi cán nasacanduu na xíxi na ta xíhi na ta já nandicuita na xíta sahá na ña cája cáhnu na yoco”, já nacaja na cáchi tuhun Ndióxi. ⁸ Joo mí xíní ñúhú candaa í mí já ná a cája í cuachi ña quihvi nuu í xihín inga najihí á xihín inga dataa tá quiahva nacaja java na cán. Ta sahá cuachi nacaja na cán naxihí oco uní mil na in túhún quivi. ⁹ Ta co ndítahan nu yo coto ndojó yo Jesucristo, xitoho í ña ná candehé yo á mé a ndaa jándoho a iní sahá cuachi cája í. Jáchi quiahva já nacaja java na cán va ta sahá ña cán naxihí na nacaja cuahá co. ¹⁰ Coto a cáhan cuéhé ndó saha Ndióxi tá quiahva nacaja java tásáhnu jícó yo cán. Jáchi sahá ña nacaja na naxihí na nacaja tátó Ndióxi, mé a xíca sáhní ñahá.

¹¹ Tóco ndihi ña nayaha xihin tásáhnu jícó yo cúu á ña náha nu yo ña co ndítahan quehe núu í Ndióxi. Ta nacayí a nuú tuhun Ndióxi já ná cuni mí, yó ndúu tiempo yóho ña co ndítahan caja í tá quiahva nacaja na cán jáchi sa nacayati quivi ndihi saha ñuyíví. ¹² Ña cán quea tá cáhán ndo cuahan vaha ndó íchi cuéntá Ndióxi já quea xíní ñúhú candaa vaha ndó mé ndó já ná a ndícava ndó nuú cuachi. ¹³ Candehé ndo. Xíní ñúhú ndicuhun ini ndó ña a juú mé ndó cuití quixi tondóhó nuu jáchi quixi tondóhó jan nu tóco ndihi java ga ñayivi. Ta ndítahan candee ini ndó Ndióxi jáchi a quiahva toho mé á ñamaní ña ná quixi tondóhó náhnu nu ndo ña co cándee ndó xihin. Ña cája Ndióxi quea chindee a ndohó tá ná quixi tondóhó nu ndo já ná cuu caja ndee ini ndó tá ná ndoho ndó ña.

¹⁴ Cándehé ndo ñani i, na cúu cuéntá Jesús. Xíní ñúhú jándacoo vaha ndó ña cája cáhnu ndó yoco. ¹⁵ Tá quiahva

cáhan i xihín ñayivi tácu ini quiahva já cáhan i xihin ndo. Ta mé ndó cándaá vaha ini ndó á ndaa á a ndaa quéa cáhan i xihin ndo. ¹⁶ Ná ndiquiahva í ndixahvi nu Ndióxi tá ndícuhun iní sahá ña nacaja Jesucristo tá naxihí a saha yo. Jáchi tá xihí vino ña yii já cúní cachi a ña in nanduú xihin mé á sahá ña naxita nij mé á ndica crúxu saha yo. Ta jári tá xixí pan ña yii ña sáhdá java nu táhan í cúní cachi a ña in nanduú xihin mé á jáchi nandiquiahva yiquí cuñu a saha yo. ¹⁷ Ta vatí cuahá ndivaha cúu yó joo in túhún pan sáhdá java í xixí jáchi xihín ña yóho náha ña in cúu ndihí xihín Jesucristo.

¹⁸ Xíní ñúhú candehé ndo ndá quiahva cája na Israel jáchi tá sáxi na cuñu quítí, rí najoco inga na nu náa cán já cúu á tátuhun mé ná nasahní na mé quítí cán ta najoco na ri. Quiahva já yáha xihin mé ndó tá sáxi ndó cuñu ña najoco na nuú yoco. Cúu á tátuhun najoco mé ndó ña. ¹⁹ Joo xíní ñúhú ndicuhun ini ndó tá cáchí i ña yóho xihin ndo co cúní cachi i ña íin sahá yoco. Ta ni co cúní cachi i ña íin chága sahá cuñu najoco na nuú yoco a juú ga inga cuñu. ²⁰ Ña cúní cachi i xihin ndo quéa tá ná joco ñayivi, na co xíní Ndióxi jan in quítí nuú yoco cúu á tátuhun jóco na jan ri nuú tiñáhá va. Ta co cája toho na ña nu Ndióxi. Ta cáxi tuhun i ña yóho xihin ndo já ná a cáxi ndó cuñu jan jáchi tá ná caxí ndó ña cacuu a tátuhun najoco ri ndóhó va ña nuú tiñáhá. ²¹ Jáchi a cuú cuhun ndo coho ndó ña najoco na nuú rí quini ta já quixi ndó coho ndó ña yii cuéntá Jesucristo, xitoho í. Ta ni a cuú cuxu ndó ña najoco na nuú rí quini ta já cuxu ndó ña yii, ña xixi na tá ndícuhun ini na ña naxihí Jesucristo, xitoho í. ²² A cája ndó ña yóho jáchi cúu á tátuhun cúní ndó jácojo ndó ini Ndióxi. Xíní ñúhú ndicuhun ini ndó ña co cúu ndó na ndacú chága a juú ga Ndióxi.

Sahá ña quihvi ini ñani táhan í cõ ndítahan caja í ndá ña nacuu cúni mí caja í

²³ Ndúu java na ta cáchi ña já: “Núná nu yõ caja í ndá ña cúni mí caja í.” Vatí ña yóho cúu á ña ndaa joo a juú ndihi ña cája í cája vaha xõhõ. Mé a ndaa núná nu yõ caja í ndá ña cúni mí joo cõ chindeé a mí cuahnu í xihín ñaha Ndióxi. ²⁴ Cõ ndítahan nu yõ nducú yó ña vaha mí cuití yõ. Ndítahan ndihi ini caja í ña vaha sahá ñani táhan í.

²⁵ Cuu caxí ndó ndijáa cuñu cáyahvi nuú yahvi ta a ndaca tuhún ndõ ndájá naquixi a já ná a cáhvi ivi joho ini ndó xihín á. ²⁶ Jáchì ñaha Ndióxi, xitoho í cúu ñuyiví yóho xihín tóco ndihi ña íin nu á.

²⁷ Candehé ndõ. Tá ná cana in ña cõ cúu cuéntá Jesús ndohó ña ná cuhun ndó cuxu ndó xihín ná, cuáhán ndõ tá cúni ndõ ta cuxu ndó tóco ndihi ña sácú ña nu ndó cuxu ndó. Ta a ndaca tuhún ndó ña á naquixi a nuú yocõ. Cuxu ndó ña jáchi tá ná ndaca tuhún ndõ ña já cuu casahá ndicani ini ndó xihín á. ²⁸ Joo tá sa nacaxi tuhun yachi na xihín ndõ ña cúu á cuñu najocõ ña nuú yocõ já queá a cúxu toho ndó ña. Jáchì tá ná cuxu ndó ña já queá caja ndó ña ná a váha cuu ini mé ña cán. ²⁹ Cáhan í ña yóho jáchi cúni ña ná caja vaha ndó sahá inga na. Cõ cáhan í ña saha mé ndó.

Mé a ndaa ndúu java ndó ta cáhán ndõ ña cõ ndítahan ndihi ini ndó sahá ña cáhvi ini inga na jáchi cáhán ndõ ña núná nu ndó caja ndó ña cúni ndõ. ³⁰ Ta java ndó cáhán ndõ ña tá sa nandiquiahva ndó ndixahvi nu Ndióxi sahá ña xixi ndó já queá a cuú cahán núu ñayivi sahá ña cája ndó. ³¹ Joo cáchi í xihín ndó ña xíní ñúhú candehé vaha í ña cája í ná a jándicava í inga na nuú cuachi. Jáchì janda xihín ña xixi ta xihín ña xihí, xíní ñúhú caja cáhnu í Ndióxi. ³² Cõ ndítahan cacuu ña jándicava inga ñayivi nuú cuachi jáchi tá cája í já cúu yó tátuhun yuu cándúhu jácachihin sahá

ñayivi. A cāja ndó já xihín nā Israel ta ni xihín nā tóho ta ni xihín nā cúu cuéntá Jesús. ³³ Ta tóco ndihi ña cāja i, cāja i ña ná cajii ini ndihi ñayivi xihín. Ta cō ndúcú u ña vaha mí i jáchi ndúcú u ña ná cajii ini ñayivi já ná cuu cacu ndaa ínimā ná.

11

¹ Xíní ñúhú caja ndó tá quiahva cāja yehe jáchi quiahva já cāja i ña nacaja Jesucristo, xitoho í.

Ña ndítahan nuú najihí caja na tá cāja cáhnu na Ndióxi

² Cájii íní i xihín ndo, ñani i, nā cúu cuéntá Jesús. Jáchi níí tiempo ñúhu ini ndó sahá i ta cāja ta cāja ndó ña najánaḥa i nu ndo. ³ Joo cúni ña ná candaa ini ndó ña cúu Jesucristo jini nuú in in taa. Ta quiahva já in in taa cúu dá jini nu ñájíhí da. Ta quiahva já Ndióxi cúu á jini nuú Jesucristo. ⁴ Sahá ña cán queá tá cō cāndaa in dataa yijini dá nani xíca tahví da nu Ndióxi á nani cáhan da tuhun Ndióxi nu táca ñayivi já queá náha ña cō cāja cáhnu da Jesucristo, mé a cúu jini nu mé dá. ⁵ Ta in ñáñáha tá cō chíjahvi ña jini ña nani xíca tahví ña nu Ndióxi á nani cáhan ña tuhun Ndióxi nuú ñayivi veñuhu já queá náha ña quehe núu ña yí ña, da cúu jini nu mé ña. Cúu á tátuhun najatá ña jini ña. ⁶ Jáchi tá cō chíjahvi in ñáñáha jini ña janda vaha chága ví ná jatá táhyí ña jini ña. Joo tá cáhán ña ña quini canáha jini ña tá ná jatá táhyí ña jini ña já queá xíní ñúhú chijahvi ña jini ña. ⁷ Cō ndítahan toho nuú in dataa chijahvi da jini dá veñuhu jáchi mé dá cúu dá da nacavaḥa Ndióxi xihín yuhú nuu mé á. Ta mé dá cúu dá da náha ndá quiahva cáhnu cúu Ndióxi. Ta náha in ñáñáha ña yí ña cúu da jini nu ña. ⁸ Jáchi xíní ñúhú ndicuhun ini ndó ña cōo natavá toho Ndióxi lásá yiquí ndicá ñáñáha já nacavaḥa mé á dataa, vaha. Ña nacaja mé á queá natavá a lásá yiquí ndicá dataa ta já nacavaḥa

mé á ñáñáha. ⁹ Jihna ñúhú ñacavaha Ndióxi dataa ta já nacavaha mé á in ñáñáha chindeé ñá da. ¹⁰ Ta sahá ña jihna ñúhú ga ñacavaha Ndióxi dataa sahá ña cán quéa ndítahan nuú in ñáñáha chijahvi ñá jini ña ná naha ñá nu táto Ndióxi ña mé a ndaa cája cáhnu ñá yí ña. ¹¹ Joo mí, na cúu cuéntá Jesús ndítahan candaa ini ña xíní ñúhú táhan taa xihin ñáha. ¹² Vatí ñacavaha Ndióxi ñáñáha nu cuítí xihin lásá yiquí ndicá dataa joo viti tóco ndihi dataa cácu da ñuyiví yóho cája najihí. Joo tóco ndihi ñayivi tácu na jáchi já cúni Ndióxi.

¹³ Mé ndó xíní ñúhú candehé ndo á vaha á a váha toho ña ná a chíjahvi in ñáñáha jini ñá nani xíca tahví ña nu Ndióxi veñuhu. ¹⁴ Jáchi sa candaa vaha ini ña a váha toho cája dataa tá íin nání ijí jini dá. ¹⁵ Joo ndisáhnu náha ñáñáha tá íin nání ijí jini ña jáchi Ndióxi nasahan ijí jini ñá nu ña já ná chijahvi a jini ña. ¹⁶ Joo tá ndúu java na ta co táhan ini na xihín ña cáhan i yóho já quéa co cúni toho i nditúhún ihvi i xihin ná sahá ña yóho. Jáchi xíní ñúhú candaa ini na ña ndijáa java ga na cúu cuéntá Jesús cája na tá quiahva cáchí i yóho tá táca na veñuhu.

Jánani Pablo na cúu cuéntá Jesús jáchi co cája ndisáhnu na tá táca na cajini na ña yí cuéntá Jesús

¹⁷ Ta íin inga ñaha cúni cahan i xihin ndó saha ta co táhan ini i xihin á. Jáchi ñañehé e tuhun ña co cája vaha ndó tá táca ndo veñuhu. ¹⁸ Candehé ndo. Sa ñañehé e tuhun ña sáhdá java táhan ndó tá táca ndo cája cáhnu ndó Ndióxi. Ta cája i cuéntá cándusa i ña cáchí na saha ndo. ¹⁹ Vatí mé a ndaa náha xíca a ña ndítahan cahnda táhan ndó já ná cuu cuni ñayivi ndá ndó cúu ndusa cuéntá Jesús ta ndá ndó co cúu cuéntá Jesús. ²⁰ Ta sahá ña sáhdá táhan ndó nu táca ndó jan, náha ña quéhe núu ndó ña yí xijini ndó ta xihín ña yóho co cúu ga ña cuéntá Jesucristo, xitoho í. ²¹ Jáchi tá ndíndaa hora cajini ndó tá in tá in

ndó sa jihna ñúhú ndo ndáva ndó cuahān ndó quehe ndó ña cajini mé cuití ndo. Ta java ndó ni co ñéhe ndó ña cuxu ndó. Joo java ndó xíhi ndó janda jáxini ndó mé ndó. ²² Vaha chága ná cuxu ndó ta ná coho ndó vehe ndó a juú ga ña ná quixi ndó quehe núu ndó veñuhu Ndióxi. Ta a váha cája ndó jáchi co ñéhe na ndahví ña cuxu na cája ndó ta xihín ña yóho cácahan nu ná. A cándati toho ndó ña cajii íni i xihín ña cája ndó yóho jáchi a juú ña vaha queá cája ndó.

Ña ndítahan caja na cúu cuénta Jesús tá xijini na ña yii cuénta Jesús

(Mt. 26:26-29; Mr. 14:22-25; Lc 22:14-20)

²³ Ña jánaḥa i nu ndo yóho cúu ña najánaḥa Jesucristo, xitoho í nuú i. Jáchi mé ñuu tá cámaní ndiquiahva na mé á ndáḥa na ihvi a já natiin a in pan. ²⁴ Tá nandihí ndiquiahva ndixahvi nu Ndióxi já nasahnda java ña ta já nacachi a já xihín ná: “Mé pan yóho cúu á tátuhun yiquí cuñu i ña ndiquiahva i saḥa mé ndó. Xíni ñúhú caja ndó ña yóho ña ná ndicuhun ini ndó ña naxihí i saḥa ndo”, nacachi Jesús. ²⁵ Ta tá nandihí naxijini na cán já natiin a in vaso nu ñúhu tó uva. Ta já nacachi a já: “Dó ñúhu ini vaso yóho cúu dó tátuhun ní i, dó cuíta saḥa ndó. Ta xihín dó yóho xinu coo nuú tuhun nasahan Ndióxi nuú ñayivi sanahá tá nacachi a jácaçu a ñayivi. Ndijáa tañu tá ná coho ndó mé tó uva, dó yii ndítahan ndicuhun ini ndó ña naxihí i saḥa ndo”, nacachi Jesús. ²⁶ Sahá ña cán queá ndijáa tañu tá táca ndo xixi ndó pan ta xíhi ndó tó uva yóho cúni cachi a ña ndicuhun ini ndó ña naxihí Jesucristo, xitoho í saḥa ndo. Ta xíni ñúhú caja ndó ña janda quiahva ná quixi tucu mé á ñuyívi yóho.

²⁷ Candehé ndo. Tá ná cuxu ndó pan ta tá ná coho ndó tó uva, ña yii cuénta Jesucristo, xitoho í ta co ín víi ínima

ndo já quea cája ndó cuachi nu mé á ta quehe núu ndó ña naxihí a ndica crúxu saha ndo. ²⁸ Saha ña cán quea tá cámani casahá cajíni ndó ña yí cuéntá Jesús xíní ñúhú coto ndojó jihna ndó mé ndó á víí ínima ndo nu Ndióxi á coó víí a. ²⁹ Jáchi tá ná cuxu ndaja nacuu ndó ña yí cuéntá Jesús já quea náha ña quehe núu ndó mé á. Jáchi ña xíxi ndó jan cúú á tátuhun yiquí cuñu mé á ta dó xíhi ndó jan cúú dó tátuhun ní á. Ta tá ná quehe núu ndó ña já quixi ña ndoho ini ndó caja Ndióxi. ³⁰ Saha ña cája ndó jan cuaha táhan ndó quíhvi ta cuaha ndó cávitá ndó ta anda java na sa naxihí ná sahá ña naquehe núu na ña yí cuéntá Jesús. ³¹ Joo tá ná coto ndojó yo mí ña á íin víí ínima yo nu Ndióxi já quea a ndítahan toho nu mé a cúú xitoho í caja víí a sahá cuachi. ³² Joo tá jándoho mé á ini mí cúú á sahá ña co cúni a ña ná ndoho iní xihín ñayivi ñuyíví tá ná xinu co quívi caja víí mé a cúú xitoho í sahá cuachi nacaja na cán.

³³ Candehé ndo, ñani i, na cúú cuéntá Jesús. Ña ndítahan caja ndó cúú ña yóho. Tá ná nditaca ndó cajíni ndó ña yí cuéntá Jesús xíní ñúhú candati táhan ndó janda quiahva ná taca tóco ndihi ndó. ³⁴ Ta tá cuíco ndó já quea xíní ñúhú cuxu ndó vehe ndó já ná a jándoho Ndióxi ini ndó sahá ña cája ndó ña núu tá táca ndo cajíni ndó ña yí jan. Ta caja víí i sahá java ga ñaha tá ná saa i coto nihni i ndohó jan.

12

Ña ñehę táhvi ñayivi nu ínima yí Ndióxi

¹ Candehé ndó, ñani i, na cúú cuéntá Jesús. Cáhyí i ña yóho nu ndo jáchi cúni ña ná canda ini ndó ndaja íin ña sáhan ínima yí Ndióxi nu yo.

² Mé ndó sa cánda vaha ini ndó ña tá cámani ndiquehe ndó íchi cuéntá Jesús já nasacuu ndó tátuhun ñayivi cuáá jáchi nasanduu ndó ndáha tá nuú yoco, ña coó tachi

cáhan. ³ Ta viti cúni caxi tũhún i xihĩn ndo ña ni in ñayivi a cuú chĩaan na chahan jata Jesús tá ta ínima yii Ndióxi quea sáhan tũhun nu ná cahan na. Ta tá cáchĩ na xihĩn ndinuhu ini na ña Jesús cúu xitoho na já quea náha ña ínima yii Ndióxi quea sáhan tũhun nu ná cahan na.

⁴ Cuahá nuú ñaha ñehe táhvi ñayivi caja na cuénta Ndióxi ta in túhún ínima yii Ndióxi sáhan ña nu ná. ⁵ Cuahá nuú chuun cuu caja ñayivi cuénta Ndióxi ta tóco ndihĩ cája chúun í cuénta mé a cúu xitoho í. ⁶ Ta sa jĩin sa jĩin cája in in í chuun nasahan Ndióxi nu yó caja í. Joo in túhún mé á quea sáhan ña yóho nuú in in í caja í. ⁷ Ta sáhan Ndióxi in ñaha nuú in in í já náha ña ñũhu ínima yii Ndióxi inĩ ta xihĩn ña yóho cuu chindee yo tóco ndihi na cúu cuénta Jesús. ⁸ Ínima yii Ndióxi yóho quea cája ña ná cuu candaa ini java ñayivi ndaja iin ña vaha xihĩn ña a váha ta já ndicani na ña nuú ñayivi. Ta sa mé ínima yii Ndióxi quea cája ña ná cuu cahan ñayivi ña ndíchĩ ndivaha. ⁹ Ta cája mé ínima yii Ndióxi yóho xihĩn java na ña ná candeé cáhnu ini na mé á. Ta sáhan mé ínima yii Ndióxi nuú java na ña ná cuu ndaja vaha na na quĩhvi. ¹⁰ Java na ñehe táhvi ná caja na ña xitúhún. Ta java na ñehe táhvi ná jáyaha na tũhun nacahan Ndióxi xihĩn ná nuú ñayivi. Ta java na ñehe táhvi ná ndicuni na ndá na cúu na cája chúun cuénta ínima yii Ndióxi ta ndá na co cája chúun toho cuénta mé á. Ta java na ñehe táhvi ná cahan na tũhun ña coo nasatiahva na. Ta java na ñehe táhvi ná nducú ñehe na ña cúni cachi tũhun cahan na cán nuú ñayivi. ¹¹ Ta sa mé ínima yii Ndióxi cája tóco ndihi ña yóho ta in túhún mé á sáhan nuú in in ñayivi ña sácú ini a caja chúun vaha na xihĩn.

In cúu tóco ndihi na cúu cuénta Jesús sahá ña candeé ini na mé á

¹² Candehé ndo. Cuahá ndivaha nu ndáca yiquí cuñu í joo in víxí cúú á. Quiahva já ñin xihín na cúú cuéntá Jesús.

¹³ Ta quiahva já yáha xihín tóco ndihi mí, coó caja toho a á cúú yó na Israel á co cúú yó na Israel. Ta coó caja toho a á cúú yó na cómí in xitoho cuéntá saha, á cúú yó na xíca núná mé. Jáchí cája ínima yíi Ndióxi ña cúú yó tátuhun in víxí ñayivi sahá ña in nanduú xihín Jesucristo tá nacandúta yó cuéntá mé á. Ta in túhún ínima yíi mé á nasacu a ini ínima in in í.

¹⁴ Xíní ñúhú ndicuhun iní ña a juú in víxí nu ndáca yiquí cuñu í jáchí cuahá ndivaha nu ndáca yiquí cuñu ñayivi.

¹⁵ Candehé ndo. Cúú á tátuhun tá ná cahan in xoo saha yo já cáchí a já: “Yehe co cúú toho í ndáha ñayivi sahá ña cán queá coó chuun toho í nuú yiquí cuñu na”, cáchí a. Joo co cája toho ña cáhan saha yo yóho jáchí cúú á cuéntá yiquí cuñu í. ¹⁶ Ta cúú á tátuhun tá ná cachi in johó í já cáchí a já: “Yehe co cúú toho í nduchú núú ñayivi sahá ña cán queá coó chuun toho í nuú yiquí cuñu na”, cáchí a. Joo co cája toho ña cáhan johó í yóho jáchí cúú á cuéntá yiquí cuñu í. ¹⁷ Jáchí caja mé ndó cuéntá ndaja caja í cuni johó í tá níí cúú yiquí cuñu í ná cacuu a nduchú núú yo. Ta ndaja caja í tahmí ñaha tá níí cúú yiquí cuñu í ná cacuu a johó í. ¹⁸ Joo in in ña ndáca yiquí cuñu í yóho nasacu Ndióxi ña mé nu ndítahan coo a jáchí já nasacu ini a caja. ¹⁹ Xíní ñúhú caja ndó cuéntá tá in víxí johó ná candaca níí cúú yiquí cuñu í já queá co ñin ndihi toho yiquí cuñu í. ²⁰ Ta vatí cuahá ndivaha nu ndáca yiquí cuñu in in í joo in víxí cúú yiquí cuñu í. Ta quiahva já ñin a xihín na cúú cuéntá Jesús.

²¹ Candehé ndo jáchí sácú u in quiahva nu ndo: Nduchú núú yo a cúú cachi a xihín ndáha yo ña co xíní ñúhú a ña. Ta ni yiquí jíní yo a cúú cachi a xihín saha yo ña co xíní ñúhú a ña. ²² Ña yáha xihín yiquí cuñu í cúú ña yóho. Java

tañu cáhán yō ña vitá in ñaha ndáca yiquí cuñu í joo ña jan xíní ñúhú chága yó ña. ²³ Ta mé xoo yiquí cuñu í ña cáhán yō coó cuahá saha, ña co cúní yō ña ná candehé ñayivi, ña cán cúú ña chíjahví vaha í ²⁴ vatí co xíní ñúhú caja í já xihín ñaha ña cuu candehé ñayivi. Xihín ña yóho cuu candaa iní ndá quiahva nacavaha Ndióxi in in xoo yiquí cuñu í ta cuu candaa iní ndaja candaa vaha chága yó ña cáhán yō coó cuahá saha. ²⁵ Ta xihín ña yóho co sáhndá java táhan yiquí cuñu í jáchi in in xoo yiquí cuñu í ndíhi ini a sahá java ga xoo yiquí cuñu í. ²⁶ Ña cán quéa tá ndícuehe in xoo yiquí cuñu í ndijáa java ga ña cán ndíhíhvi a sahá ña ndóho in xoo yiquí cuñu í. Joo tá ví cája na xihín in xoo yiquí cuñu í já quéa cájii ini java ga xoo yiquí cuñu í.

²⁷ Ta tóco ndihi ndó, na cúú cuéntá Jesús cúú ndó tátuhun yiquí cuñu Jesucristo jáchi in nanduu ndihi ndó xihín á ta in in ndó cúú ndó tátuhun in xoo yiquí cuñu a. ²⁸ Ta tá quiahva ín chuun cája in in xoo yiquí cuñu í quiahva já ín chuun caja in in na cúú cuéntá Jesús. Jihna ñúhú nacaxi Ndióxi na apóstol ta já nacaxi a na jáyaha tuhun Ndióxi nuú ñayivi ta já nacaxi a na jánaha tuhun Ndióxi nuú ñayivi ta já nacaxi a na cája ña xitúhún. Ta já nacaxi a na ndája vaha na quíhvi xihín na chindeé ñayivi xihín na sáhndá chuun nuú java ga ñayivi xihín na cáhan tuhun ña coó nasatiahva na. ²⁹ Joo a juú ndihi na cán cúú apóstol. Ta ni a juú ndihi na cúú ná na jáyaha tuhun cáhan Ndióxi nuú ñayivi. Ta ni a juú ndihi na jánaha ñayivi. Ta ni a juú ndihi na cája ña xitúhún. ³⁰ Ta ni a juú ndihi na ndája vaha na na quíhvi. Ta ni a juú ndihi na cáhan tuhun ña coó nasatiahva na. Ta ni a juú ndihi na tiahva nducú ñehe ña cúní cachi tuhun cáhan na cán. ³¹ Joo mé ndó xíní ñúhú ndinducú ndo ña ná quiahva Ndióxi in ña vaha chága nu ndo. Ta viti cúní jánaha i ña cúú ña vaha chága nu ndo.

13

Ña ndítahan caja í tá quíhvi iní ñayivi

¹ Tá ná cuu caħan i tá nuú tuħun cáħan ñayivi ndúu ñuyiví yóho ta tá ná cuu caħan i tuħun cáħan táto Ndióxi joo tá co quíhvi iní i ñayivi já queá coó saħa toho ña cáħan i. Jáchi xihín ña jan cúu u tátuhun in caa jácasá ña, á tátuhun in caa xoo tá jácasá ña ña. Quiahva já iin i tá co quíhvi iní i ñayivi. ² Ta ni coó saħa ña ná cacuu u in da jáyaha tuħun cáħan Ndióxi nuú ñayivi tá co quíhvi iní i ñani táhan i. Jáchi tá co quíhvi iní i ñayivi coó caja toho ña ná cuu candaa iní i tóco ndihi ñaha ta ni coó caja toho a tá xini tóco ndihi ña xini da ndichí ta ni coó saħa toho tá cándéé cáħnu ndivaha iní i Ndióxi janda quiahva cuu caħan i xihín in yucu ña ná ndicanda ña. Coó saħa toho tóco ndihi ña yóho tá co quíhvi iní i ñani táhan i. ³ Ta vatí ná ndicahnda i tóco ndihi ña cómi i ta já quiahva i ña nuú ña ndahví coó saħa toho ña cája i tá co quíhvi iní i ñayivi. Ta ni coó caja toho ña ná ndiquiahva i yiquí cuñu i ña ná çayi a saħa ña cáħan i tuħun Ndióxi tá co quíhvi iní i ñayivi.

⁴ Jáchi tá mé a ndaa táhyí quíhvi iní ñayivi co ndihi iní xihín ná. Ta tá quíhvi iní ña táhvi iní saħa ná ta co cáhíhvi toho iní xihín ná. Ta ni co cája lándá yo nu ná ta ni co cája cáħnu í mí nu ná. ⁵ Tá quíhvi iní ñayivi iin toní ñúhú yo xihín ná ta co cájihnda yó ñaha nu ná jáchi co ndúcú yo ña vaha mé cuití yo. Ta ni co xójo iní xihín ná. Ta ni co quéhé cuéntá saħa ña núu cája na xihín yo tá quíhvi iní ña. ⁶ Ta tá quíhvi iní ñayivi co cájii toho iní tá cája núu na joo cájii iní tá cája na ña ndaa. ⁷ Tá quíhvi iní ñayivi iin tiahva í ndoho iní saħa ná ta cáhvi iní ña vaha cuití va saħa ná. Ta cándúsa í ña cája na ña ndaa. Ta saħan ndeé iní xihín tóco ndihi ñaha.

⁸ Tá mé a ndaa quíhvi iní ñani táhan í já quéa anda ama cáa quívi a ndíhi sahá ña quíhvi iní na. Joo vaxi quívi a jáyaha ga ñayivi tuhun cáhan Ndióxi xihín ná nuú ñayivi jáchi vaxi quívi ndíhi sahá. Ta a cáhan ga na tuhun ña coó nasatiahva na. Ta vaxi quívi ndíhi sahá ña ndíchí jini ñayivi. Joo a ndíhi toho saha ña quíhvi ini táhan í. ⁹ Jáchi chá cuití xini yó saha Ndióxi ta chá cuití tiahva í jáyaha í tuhun cáhan Ndióxi nuú ñayivi. ¹⁰ Joo tá ná xinu coo quívi ndaja Ndióxi ña ná nduú ñayivi vií já quéa a cúní ñúhú ga yó ña tóco ndíhi java ga ña ndíhi saha cán jáchi sa nanduú ñayivi vií nu mé á.

¹¹ Candehé ndo. Tá nasacuu u in taa loho nacahan i tá quiahva cáhan na valí ta quiahva já nacahvi ini i ta quiahva já nacaja i. Joo tá nasahnu i najándacoo i ña caja na valí. ¹² Viti co cándaa vaha iní ndá quiahva cáa Ndióxi. Cúu á tátuhun tá sándehe yo nuú in yutátá ña co jínu vaha ga. Joo vaxi quívi cuní mé á tá quiahva cáa. Viti cuahá ñaha co cándaa iní saha mé á. Joo vaxi quívi cándaa iní saha mé á tá quiahva xini mé á mí viti. ¹³ In uni nuú ñaha ña a ndíhi sahá. Ta ña yóho cúu á: ña cándéé iní Ndióxi, ta inga cúu ña ndátí casaa, ta inga cúu ña quíhvi iní Ndióxi xihín ñani táhan í. Ta cúní Ndióxi ña ná caja í ndihuni ña yóho joo ña cáhnu chága cúu ña quíhvi iní Ndióxi xihín ñani táhan í.

14

Tá cáhan ñayivi tuhun ña coó nacatiahva na

¹ Xini ñúhú ndíhi ini ndó quíhvi ini ndó ñani táhan ndó. Ta xihín ndinuhu ini ndó ndinducú ndo ña sahan ínima yii Ndióxi nu yo. Ña xini ñúhú ndíhi chága ini ndó ndinducú ndo cúu ña ná cuu jáyaha ndó tuhun cáhan Ndióxi xihín ndó nuú ñayivi. ² Jáchi ndá na nacuu cáhan tuhun ña coó nacatiahva na já quéa cáhan na xihín Ndióxi joo co cáhan

na xihín ñayivi jáchi co cándaꝯ ini ñayivi ña cáhan na. Ña cáhan na cúu ña naquixi cuéntá ínima yii Ndióxi ta cúu á ña co xíní ndihi ga ñayivi. ³ Joo ñayivi tiahva jáyaha tuhun cáhan Ndióxi xihín ná nuú ñayivi cája na ña ná cuu cuahnu chága na cúu cuéntá Jesús xihín tuhun cáhan Ndióxi. Ta sáhan na tuhun ndeé ini ñayivi ta quiahva já jáxinu chága na ini na cán. ⁴ Ta na ñéhe táhvi cáhan tuhun ña coó ñacatiahva na sáhnú mé cuití va na xihín tuhun sáhan Ndióxi nu ná cahan na. Joo na tiahva jáyaha tuhun cáhan Ndióxi nuú ñayivi chindeé na na cúu cuéntá Jesús ña ná cuahnu chága na xihín ñaha cuéntá Ndióxi.

⁵ Mí i cájii íní i tá ná cuu cahan ndihi ndó tuhun ña coó nasatiahva ndó. Joo cájii chága ini i tá ná jáyaha ndó tuhun cáhan Ndióxi xihín ndó nuú ñayivi jáchi xíní ñúhú chága ña yóho a juú ga ña ná cahan ndó tuhun ña coó ñacatiahva ndó. Vaha cája ndó ña ná cahan ndó tuhun ña coó ñacatiahva ndó tá íin in na tiahva nducú ñehe ña cúní cachi tuhun cáhan ndo nuú ñayivi já queá ná cuu cuahnu na cúu cuéntá Jesús xihín mé tuhun cán. ⁶ Xíní ñúhú candehé vaha ndó ña cáhan i xihín ndo, ñani mí i na cúu cuéntá Jesús. Coó saha toho ña cája i tá ná saa i coto nihni i ndohó ta já casáhá i cahan i inga tuhun ña co cándaꝯ ini ndó. Tá ná caja i já ndaja caja ndó candaꝯ ini ndó tuhun Ndióxi. Ña ndítahan caja i queá cahan i xihín ndo ña najánaḥa Ndióxi nuú i. Ta ndítahan cahan i ña ndichí cuéntá Ndióxi. Ta ndítahan cahan i tuhun nasahan Ndióxi nuú i jáyaha i ña nu ndo. Ta ndítahan jánaḥa i ña ndaa cuéntá Ndióxi nu ndo.

⁷ Sácú u in quiahva nu ndó sahá in tóyoo xihín dó jácaha. Ndaja caja ñayivi candaꝯ ini na ndá yaa tiví yo tá co tiáhva í tiví vaha í, á tá co tiáhva í jácaha vaha í. ⁸ Ta ndaja caja na soldado cacu tiahva na mé ná ña ná cuhun na cani táhan na tá ta co tiáhva vaha da tiví trompeta tiví

da do. ⁹ Quiahva já yáha ri xihin mé ndó jáchi tá co cáhan ndó tuhun ña cuu candaa ini ñayivi ndaja caja ri na cán candaa ini na ña cáchi ndo. Cúú á tátuhun cáhan ndó nu táchi cuití va. ¹⁰ Caja i cuéntá ín cuahá ndivaha nuú tuhun cáhan ñayivi ndijáá ñuyíví. Joo ndijáá tuhun yóho cáxi cáhan nuú ñayivi cáhan na mé tuhun yóho. ¹¹ Joo tá co cándaa ini i ña cáhan inga ñayivi xihín i já cúú u tátuhun in da tóho nu mé ná. Ta na cán cacuu na tátuhun in na tóho nu mí i sahá ña co cándaa ini i tuhun cáhan na. ¹² Sahá ña cán queá tá mé a ndaa cúní ndó ndiquehe ndó ña sahan ínima yíi Ndióxi nu ndo já queá xíní ñúhú ndinducú ndó ña ná cuu chindeé ndó na cúú cuéntá Jesús ná cuahnu chága na xihín tuhun Ndióxi.

¹³ Ña cán queá ndá ndó ñehe táhvi cáhan ndó tuhun ña coo ñacatiáhva ndó já queá xíní ñúhú caça ndó nu Ndióxi ña ná cuu ndicani ndó ña cúní cachi a nuú ñayivi. ¹⁴ Jáchi tá ná casahá cáhan i tuhun ña coo ñacatiáhva i nani xíca tahví i nu Ndióxi já queá mé a ndaa caja cáhnu i Ndióxi xihín ínima i joo co caja i ña xihín xíní túní i jáchi co cándaa ini i ña cáhan i. ¹⁵ Ndía caja i. Ña xíní ñúhú caja i queá caça tahví i nu Ndióxi xihín ínima i ta xihín xíní túní i. Ta quiáhva já xíní ñúhú cata i xihín ínima i ta xihín xíní túní i viti. ¹⁶ Candehé ndó. Ná caja í cuéntá tá ndúu ndó veñuhu ta casahá ndo cáhan ndó tuhun ña coo ñacatiáhva ndó nani caja cáhnu ndó Ndióxi xihín ínima ndo ta ndaja coo quíhvi in ñayivi ini veñuhu, na co cándaa cuahá ini sahá ñaha cuéntá Ndióxi. Ta xíní johó na ña cáhan ndo joo a cúu caja na ndiquiahva na ndixahvi nu Ndióxi in nuú xihín ndo jáchi co cándaa ini na tuhun cáhan ndo. ¹⁷ Vatí ndató ndivaha cáhan ndo ndiquiahva ndó ndixahvi nu Ndióxi joo co chindeé a na cán ná cuahnu na xihín tuhun Ndióxi jáchi co cándaa ini na tuhun cáhan ndo. ¹⁸ Ndiquiahva i ndixahvi nu Ndióxi jáchi cáhan cuaha

chága i tuhun ña coó nasatiahva i a juú ga ndóhó. ¹⁹ Joo nani jánaħa i ndóhó ini veñuhu cájii chága íní i cahan chá cuití va i tuhun já ná cuu candaa cáxí ini ndó ña cahan i. Jáchi ndá chuun quea ná cahan cuahá nahá i tuhun ña co candaa ini ndó.

²⁰ Candehé ndo ñani i, na cúu cuéntá Jesús. A cáhvi ini ndó tá quiahva cáhvi ini na valí. Xíní ñúhú cahvi ini ndó tá quiahva cáhvi ini ñayivi sa tácu ini. Vatí mé a ndaa xíní ñúhú caja ndó tá quiahva cája na valí, na co cája cuachi. ²¹ Xíní ñúhú ndicuhun ini ndó ndaja cáhí ley nacahyi Moisés sanahá tá nacachi Ndióxi já: “Vatí ná chindahá i na cahan java tuhun tóho nuú ñayivi Israel joo a cuni johó na nuú cahan na tóho cán jáchi sáa ini na Israel”, nacachi Ndióxi. ²² Tá cahan ndó tuhun ña coó nasatiahva ndó nani cája cáhnu ndó Ndióxi co chindeé cuahá ña yóho na cúu cuéntá Jesús cuahnu na xihín tuhun Ndióxi vatí mé a ndaa na co xíní tuhun Ndióxi cátontó na xihín ña yóho. Joo tá jáyaha ndó tuhun cahan Ndióxi xihín ndó nuú na cúu cuéntá Jesús já cuu cuahnu chága na xihín tuhun Ndióxi vatí co chindeé cuahá ña yóho na cámani ndihvi íchi cuéntá Jesús. ²³ Caja mé ndó cuéntá tá ná taca cuahá na cúu cuéntá Jesús ta casahá cahan ndo tuhun ña coó nasatiahva ndó nani cája cáhnu ndó Ndióxi ta ndaja coo quíhvi na co xíní tuhun Ndióxi nu ndúu ndó jan. Ta tá ná cuni na ña sa jiin tuhun cahan ndihi ndó já quea cahan na ña cúu ndó na tachi. ²⁴ Joo tá ná jáyaha tóco ndihi ndó tuhun cahan Ndióxi nuú ñayivi ta ndaja coo quíhvi in na co xíní tuhun Ndióxi. Ta tá ná cuni johó na ña cahan ndo já quea tahnda ini na sahá cuachi na ta já casahá ndícani ini na sahá ña núu cája na. ²⁵ Ta já nahma na cuachi na nuú ñayivi ta já ndicava xítí na caja cáhnu na Ndióxi. Ta xihín ña yóho candaa ini na ña mé a ndaa táhyí iin Ndióxi tañu ndó.

Tóco ndihi ña cája ndó cuéntá Ndióxi xíní ñúhú caja ndó ña xihín toni ñúhú

²⁶ Candehé ndó, ñani i, na cúu cuéntá Jesús. Tá ná nditaca ndihi ndó caja cáhnu ndó Ndióxi ndítahan nuú java ndó cata ndó salmo ta java ndó jánaha ndó nuú ñayivi. Ta ndítahan nuú java ndó jáyaha ndó tuhun cáhan Ndióxi xihín ndó nuú ñayivi ta java ndó cahan ndó tuhun ña coó nacatiahva ndó. Ta ndítahan nuú java ndó nducú ñehe ndó ña cúní cachi tuhun cáhan na cán. Tóco ndihi ña cája ndó xíní ñúhú chindeé a ndohó ná cuahnu chága ndó xihín tuhun Ndióxi. ²⁷ Ta ndítahan nuú ivi á uní ñayivi cuití va cahan na tuhun ña coó nacatiahva na. Joo tá in tá in na caja na ña. Ta ndítahan canduu na tiahva nducú ñehe na ña cúní cachi tuhun cáhan na jan. ²⁸ Ta nu táca ndo tá coó ni in na tiahva nducú ñehe ña cúní cachi tuhun cáhan na jan já queá vaha chága ná a cahan na tuhun ña coó nacatiahva na. Ña vaha chága queá ná cahan yaá na ña ná cuni johó mé ná xihín Ndióxi cuití va. ²⁹ Ta quiahva já tá jáyaha na tuhun cáhan Ndióxi xihín ná nuú ñayivi ná cahan ivi á uní na cuití va. Ta xíní ñúhú cahan na nani ndúu tútú java ga na veñuhu sándehe na á mé a ndaa cahan na cuéntá Ndióxi. ³⁰ Cája i cuéntá nani jáyaha in na tuhun cáhan Ndióxi xihín ná nuú ñayivi ta jácahan Ndióxi ini inga na ña ná jáyaha na tuhun cáhan Ndióxi xihín na nuú ñayivi já queá xíní ñúhú cacoo na nu cuití cán. ³¹ Xihín ña yóho tá in tá in ndó cuu jáyaha ndó tuhun cáhan Ndióxi xihín ndó nuú ñayivi. Já cuu catiahva na xíní johó ña yóho ña ná ndindeé chága ini na xihín tuhun Ndióxi. ³² Na jáyaha tuhun Ndióxi nuú ñayivi xíní ñúhú cañehe na quiahva xihín ña cája na nani ndáti na jáyaha na tuhun cán. ³³ Jáchi cúní Ndióxi ña ná coo vaha iní caja í tóco ndihi ñaha ta ná a jána í nuú cája í ña.

Ta cájii ini mé á tá cája vaha ndó tá quiahva cája java ga

na cúu cuéntá Jesús ndúu ndijáá ga ñuu. ³⁴ Nani táca ndo veñuhu co ndítahan nuú najihí cahan na jáchi co cáni a nu ná cahan na. Ta co ndítahan nu ná cacomí na cuéntá sahá na veñuhu jáchi quiahva já sáhdá ley Moisés. ³⁵ Ta tá cúni na candaá ini na sahá ña jánaha na veñuhu xíní ñúhú ndaca tuhún na yíi ná sahá tá cása na vehe na. Jáchi co náha vaha tá cahan in ñáñaha nani táca na veñuhu.

³⁶ Xíní ñúhú ndicuhun ini ndó ña a juú ndóhó cúu na nandiquehe tuhun Ndióxi nu cuítí. Ta a juú ndóhó cuití xíní tuhun Ndióxi, vaha. ³⁷ Ta ndá na cáhan ña nachutú ndaa ínima ná xihín ínima yíi Ndióxi ña ná jáyaha na tuhun cáhan Ndióxi xihín ná nuú ñayivi, mé na cán ndítahan nu ná ndicuni na ña cáhan i ña sáhdá Ndióxi nuú i cahan i. ³⁸ Joo tá co cúni na cán cuni johó na ña cáhan i cuéntá Ndióxi já quéa a cúni johó ndó ña cáhan na cán.

³⁹ Candehé ndo, ñani i, na cúu cuéntá Jesús. Xíní ñúhú ndihí ini ndó nducú ndó ña ná jáyaha ndó tuhun cáhan Ndióxi xihín ndó nuú ñayivi. Ta a cájí nuu ndó nuú na cúu cuéntá Jesús tá ñéhe táhvi ná nu Ndióxi cahan na tuhun ña coó nasatiahva na. ⁴⁰ Joo tóco ndihí ña cája ndó xíní ñúhú caja ndó ña xihín toní ñúhú já ná a jána ndó nu cája ndó ña.

15

Ndícani Pablo sahá quivi tá nanditacu Jesús

¹ Candehé ndó, ñani i, na cúu cuéntá Jesús. Viti cúni ña ná ndicuhun ini ndó tuhun vaha sahá Jesús ña najánaha i nu ndo. Mé tuhun vaha yóho sa nandiquehe vaha ndó ña ta cándeé vaha ini ndó a janda viti. ² Ta jivi saha mé tuhun vaha najánaha i nu ndo yóho cuu cacu ndaa ínima ndo tá ná caja ndó ña najánaha i nu ndo xihín ndinuhu

ini ndó. Joo tá ná a cája ndó ña já quéa mé a uun va quéa nacandúsa ndó ña.

³ Candehé ndó. Ña jihna ñúhú nacaja i quéa najánaḥa i ndohó ña nacatiahva mí i cuéntá Jesucristo, mé á naxihí ndica crúxu sahá cuachí tá quiahva cáchí tuhun Ndióxi.

⁴ Ta najánaḥa i ndohó ña najánduxu na mé á joo tá naxinu quiví uní já nanditacu tucu a tá quiahva cáchí tuhun Ndióxi coo.

⁵ Ta já nanaha mé á nu Pedro xihín nuú java ga táhan da uxu ivi naxica tuun xihín a cán.

⁶ Ta tá nandihí já nanaha mé á nu yáha ga nuú uhun ciento na cúu cuéntá mé á. Ta in naxini tocó ndihí na mé á. Ta cuaha táhan na naxini ñahá cán tácu yij va na vatí java na sa naxihí na.

⁷ Ta tá nandihí já nanaha mé á nu Jacobo ta anda já nanaha mé á nu tóco ndihí na naxica tuun xihín á.

⁸ Ta tá nu ndihí já nanaha ri Jesús mé á nuú i vatí cúu u da nacacu tá sa nayaha mé tiempo tá naxica nuu Jesús ñuyiví yóho.

⁹ Yehe cúu u in apóstol joo ín chága saha tóco ndihí java ga na apóstol a juú ga yehe. Ta ni coó sahá i cahan na apóstol xihín i jáchí naxica nuu i nacaja xíxi i xihín na cúu cuéntá Ndióxi jihna.

¹⁰ Joo mé a ndaa cúu u in apóstol jáchí nacamáni Ndióxi yehe. Ta a juú ña uun cúu ñamaní nacaja Ndióxi xihín i jáchí cuahá ga chuun cája yehe cuéntá mé á a juú ga java ga na apóstol cán. Vatí mé a ndaa co cája chúun i xihín ndée mí i. Sahá ña táhvi ini Ndióxi sahá i sahá ña cán quéa chindeé a yehe cája i chuun mé á yóho.

¹¹ Joo co cája toho a á yehe á na java apóstol cán cája chúun chága. Ña vaha quéa tóco ndihí nde jánaḥa nde sahá Jesucristo ta mé ndó sa nacandúsa ndó ña najánaḥa nde nu ndo.

Vaxi quiví nditacu tóco ndihí ndij

¹² Tá nacahan nde tuhun Ndióxi xihín ndo najánaḥa nde ndohó ña nanditacu tucu Jesucristo ta nacandúsa ndó ña. Joo viti java ndó cáchí ndo ña co nditacu toho na sa naxihí.

¹³ Joo tá cáchí ndo ña co ndítacu toho na sa naxihí cúú á tátuhun co cándúsa ndó ña nanditacu tucu Jesucristo. ¹⁴ Ta tá co cándúsa ndó ña nanditacu tucu Jesucristo já queá coó saha toho tuhun Ndióxi ña xíca nde jánaħa nde nuú ñayivi. Ta xihín ña yóho mé a uun va cándeé ini ndó mé á. ¹⁵ Ta tá mé a ndaa coó nanditacu Jesucristo já queá cúú nde na cáħan ña tuhún saha Ndióxi jáchí cáchí nde xihín ndo ña mé Ndióxi najánditacu a Jesucristo. Joo tá co ndítacu toho ndij ta ndeħe cáchí nde ña nanditacu Jesucristo já queá cúú nde na tuhún. ¹⁶ Jáchí tá co ndítacu ndij já queá cúní cachi a ña coó nanditacu toho Jesucristo. ¹⁷ Ta tá coó nanditacu Jesucristo já queá coó saha toho ña cándeé ini ndó mé á ta cómí yij va cuachi cuéntá saha ndó. ¹⁸ Ta xihín ña yóho cúní cachi a ña a cácu ndaa toho ínima na cúú cuéntá Jesús tá ná quivi na. ¹⁹ Tá ndíyahvi ña cúú yó cuéntá Jesús nani tácu yo ñuyíví yóho cuití va já queá ndáhví nahá ñacuú.

²⁰ Joo mé a ndaa nanditacu ndusa Jesucristo. Ta mé á cúú á ña nu cuití nanditacu. Ta vaxi quiví nditacu tóco ndihi yó, na cúú cuéntá mé á. ²¹ Candehé ndo. Naquihvi cuachi ñuyíví saħá ña ñacaja Adán, da nasacuu ta nu cuití ta saħá cuachi yóho ñacasáħá xihí ñayivi. Ta jivi saħá ña ñacaja Jesucristo tá naxihí a ndica crúxu cuu nditacu tóco ndihi na sa naxihí. ²² Xihí ñayivi saħá ña ñaquixi na chichi Adán ta cája na ña núu tá quiahva ñacaja Adán sanahá. Ta viti saħá ña cúú yó cuéntá Jesucristo catacú anda ama cáa quivi saħá ña ñacaja mé á. ²³ Ta tá ná ndindaa nuú in in na ndítacu na já ndítacu na caja Ndióxi. Mé Jesucristo queá nanditacu nu cuití. Ta tá ná ndicó coo tucu mé á ñuyíví yóho já caja mé á ña ná nditacu tóco ndihi na cúú cuéntá mé á. ²⁴ Anda já ndihi saħá tóco ndihi ñaha ñuyíví yóho jáchí jándihi Jesucristo saħá tóco ndihi na cómí cuéntá saħá ñayivi ñuyíví yóho. Ta ndiquiahva tóco

ndihi nā cúu cuéntá mé á ndáha Ndióxi, tátá a já ná cacomí a cuéntá saha ná. ²⁵ Jáchi Jesucristo queá ndítahan nu cacomí cuéntá sahá nā cúu cuéntá mé á janda quiahva ná xinu co quivi jándihi Ndióxi saha tóco ndihi nā co cúní ñahá. ²⁶ Ta janda nu ndíhí jándihi mé á sahá ña ná quivi ñayivi. Ta xihín ña yóho a quivi ga ñayivi. ²⁷ Jáchi mé Ndióxi nandiquiahva tóco ndihi ñaha nuú Jesucristo já ná cacomí a cuéntá sahá. Joo tá cáchí tuhun Ndióxi ña cómí Jesucristo cuéntá saha tóco ndihi ñaha, co cúní cachi a ña cómí a cuéntá saha Ndióxi viti jáchi mé Ndióxi queá nandiquiahva tóco ndihi ñaha ndáha mé á ña ná cacomí a cuéntá sahá. ²⁸ Ta tá sa cómí Jesucristo cuéntá saha tóco ndihi ñaha anda já ndiquiahva Jesucristo mé á ndáha Ndióxi ña ná cacomí a cuéntá sahá. Jáchi cúu á in túhún jini já jahyi Ndióxi ta mé Ndióxi queá nandiquiahva tóco ndihi ñaha nuú Jesucristo. Ta Ndióxi cacuu a ña cáhnu chága nu tóco ndihi ñaha.

²⁹ Ndúu java ñayivi ta cándúta ná sahá nā sa naxihí já ná cacu ndaa ínima ná. Joo cáchí nā co cándúsa toho na ña ndítacu ndji. Ta ndá sahá queá cāja na já tá co cándúsa na nditacu ndji. Joo xini vaha í ña nditacu ndji.

³⁰ Ndá chuun queá chícaan yo mí ndijáá níi quivi nuú tondóho nuú cuu cahní nā mí tá co cándúsa í ña nditacu tucu ndji. ³¹ Candehé ndo, ñani i, nā cúu cuéntá Jesús. Ndijáá níi quivi vaxi tondóho nuú i. Ta jalóho cúní quivi i. Mé ndó cándaá vaha ini ndó ña cájii ini i sahá in nanduu ndó xihín Jesucristo, xitoho í. Saha ña cán queá ndítahan nu ndo candúsa ndó ña cáhan i xihín ndo. ³² Cuahá tañu naquihvi táhan i xihín ñayivi quini ñuu Efeso. Mé nā cán cúu ná tátuhun quití yúcú. Joo coó saha toho ña ndóho ini i yóho tá mé a ndaa co ndítacu toho ndji. Jáchi tá co ndítacu toho ndji já queá cuu cohó caja í tá quiahva cáchí java ñayivi tá cáchí nā já: “Cóho cuxu vaha í ta coho vaha

í jáchī yó quiví itaān á iajá cúú yó.”

³³ A quiahva ndó ñamanī jándahvi inga na ndohó. Xíní ñúhú ndicuhun ini ndó in tuhun ñā cáchí já: “Tá cátáhan í xihín ñayivi, nā cō cája vaha já queā játiví nā mí.” ³⁴ Xíní ñúhú ndicáxí vaha ini ndó ta a cája ndó cuachi jáchī ndúu java ndó ta cō xíní toho ndó Ndióxi. Cáhan í ñā yóho xihín ndo já ná cacahan nuu ndo sahá ñā núu cája ndó.

Ndaja coo tá ná nditacu ndji

³⁵ Cája í cuéntá ñā ndúu java ndó ta ndícani ini ndó já cáhán ndo já: “Ndaja caja Ndióxi jánditacu a nā sa ñaxihí. Ndá yiquí cuñu ndiquehe na caja Ndióxi.” Já ndāca tuhún java ndó ndícani ini ndó. ³⁶ Joo ñā ndícani ini ndó saha jan cúú á ñā tóntó ndivaha. Xíní ñúhú cándehé ndo ndá quiahva yáha xihín in tata tá chíhin na ñā. Mé tata yóho xíní ñúhú quivi a já ná nduta utu loho nu á. ³⁷ Tá xútu ñayivi, cō xútu toho na in yucu. Ñā xútu na cúú mé tata ta cō cája toho a á cúú á trigo á inga nuú tata. ³⁸ Ta mé Ndióxi queā cája ñā ná ñehē táhvi in in a cán ndá quiahva coo a ta ndá javí cañehe in in a. ³⁹ Ta a juú in javí ñéhe tóco ndihi ñaha. Sa jíin sa jíin javí in in a. Tátuhun yiquí cuñu in dataa, sa jíin íin yiquí cuñu da xihín yiquí cuñu quítí. Ta yiquí cuñu laa sa jíin íin a xihín yiquí cuñu tiyacá. Sa jíin ñacaja Ndióxi xihín in in ñā ñacavaha mé á. ⁴⁰ Ta quiahva já ñacavaha Ndióxi ñā ndúu indiví ta jíin va ndáa a. Ta jíin yiquí cuñu ñayivi ñuyíví yóho. Ta sa jíin quiahva ndató ñā íin indiví ta sa jíin quiahva ndató ñā íin ñuyíví. ⁴¹ Jíin ñacaja Ndióxi ñā ná yehe candii ta jíin ñacaja mé á ñā ná yehe yoo. Ta jíin ñacaja mé á ñā ná yehe quími ta íin java quími sa jíin sa jíin yehe rí nuú inga rí. ⁴² Quiahva já vaha ri xihín ñayivi tá ná xinu cōo quiví jánditacu Ndióxi nā. Jáchī yiquí cuñu yó ñā jánduxu nā tixi ñúhu cúú á ñā ndihi saha. Joo tá ná nditacu tucú já a ndíhi ga saha yo anda

ama cáa quívi. ⁴³ Mé yiquí cuñu í jánduxu na tixi ñúhu yóho cúu á tátuhun in ña núu ndivaha jáchi ndihi sahá. Joo tá ná xinu cõo quívi ndicõo tucu a caja Ndióxi já cacuu a ña ndató ndivaha jáchi a ndíhi sahá. Ña jánduxu na tixi ñúhu cúu á ña vitá ndivaha joo ña nditacu tucu cacuu a ña ndacú vaha. ⁴⁴ Jáchi tá ná jánduxu na mí tixi ñúhu, ña jánduxu na cúu yiquí cuñu cuéntá ñuyívi yóho. Joo tá ná nditacu tucú já ñehe yó inga yiquí cuñu, ña cúu cuéntá indiví. Jáchi tá ñin yiquí cuñu cuéntá ñuyívi, ña ndíhi saha ta já ñin ri yiquí cuñu cuéntá indiví, ña a cuú ndihi saha.

⁴⁵ Cáchi tũhun Ndióxi ña tá ñacavaha Ndióxi Adán, da ñasacuu ta nũ cuítí já ñacaja mé á ña ná catacu da. Joo cáhnu chága Jesucristo a juú ga Adán jáchi mé á cája ña ná catacu ñayivi anda ama cáa quívi. ⁴⁶ Ña jihna ñúhú sahan Ndióxi nu yõ cúu yiquí cuñu í, ña ndíhi yachi saha. Ta tá nu ndíhi já sahan mé á inga yiquí cuñu nu yõ cuéntá indiví ta ña cán cúu á ña cõ ndíhi saha. ⁴⁷ Mé Adán, da ñacavaha Ndióxi nu cuítí ñasacuu da da ñacavaha mé á xihín ñundáhyi ta cúu dá da ñuyívi yóho. Ta Jesucristo, xitoho í, cúu á inga táhan dãtaa joo cúu á ña ñaquixi chí indiví. ⁴⁸ Tá in tá in ñayivi ñehe na yiquí cuñu tátuhun yiquí cuñu Adán jáchi cúu á ña ñacavaha Ndióxi xihín ñundáhyi. Joo ñayivi, na ndíquiahva mé ndáha Jesucristo vaxi quívi ndiquehe na inga yiquí cuñu cuéntá indiví, ña cõ ndíhi saha. ⁴⁹ Ta viti ñin yiquí cuñu í tátuhun yiquí cuñu Adán joo vaxi quívi ndiquehé inga yiquí cuñu í cuéntá indiví ta cacuu a tátuhun yiquí cuñu Jesucristo.

⁵⁰ Candehé ndõ, ñani i, na cúu cuéntá Jesús. Cúni çaxi tũhun i xihín ndõ ña a cúu toho cũhun yiquí cuñu í yóho indiví ña ná cacomí Ndióxi cuéntá sahá jáchi mé yiquí cuñu í yóho cõ cúu á ña cuu catacu anda ama cáa quívi. Joo ña inga, ña quiahva mé á nu yõ cán, a ndíhi toho sahá.

⁵¹ Ta viti cúni çaxi tũhun i nu ndõ sahá in ñaha ñasahjin

jehé nuú ñayivi ta ña yóho queá: A juú ndihi toho í quiví jáchi tá ná xinu coo quiví quixi tucu Jesucristo ñuyiví yóho anda jávi ndijama ndihí tá quiahva ndáa í ta mé Ndióxi quiahva inga yiquí cuñu nu yo. ⁵² Ta in náá cuití vaha ña yóho jáchi cacuu a tátuhun in ndicuaní nuu yo ta já ndahyi trompeta, mé dó ndahyi nu ndihí cuí cán já nditacu tóco ndihi na sa naxihi ta a ndícó coo ga na quivi na. Ta mí, tá tácu yo, ña caja Ndióxi xihin yo queá ndijama yiquí cuñu í. ⁵³ Jáchi mé yiquí cuñu í ña ndíhi saha yóho a cuú toho nduu a tátuhun yiquí cuñu ña quiahva Ndióxi nu yo. Saha ña cán queá xíní ñúhú ndijama mé á yiquí cuñu í yóho já ná cuu cohó coo í xihin mé á anda ama cáa quivi. ⁵⁴ Ta tá sa nandijama yiquí cuñu í ta nanduu a ña co ndíhi saha anda ama cáa quivi já queá xinu coo nuú tuhun ña nacachi na profeta sanahá: “Vaxi quiví ndihi sahá ña xíhi ñayivi jáchi nacandee Jesucristo nasahnu a nuú ña xíhi na. ⁵⁵ Ta xihín ña yóho cája cáhnu í mé á jáchi a quiví ga ñayivi sahá ña naquee vaha Jesucristo”, cáchi tuhun Ndióxi. ⁵⁶ Tá cája ñayivi cuachi já quivi tá quivi na sahá ña cája na. Ta cúu á tátuhun tá tíin líhma na jáchi ndóho ini na sahá cuachi na. Anda sanahá ndivaha sáhdá ley Moisés ña quivi ñayivi sahá cuachi na jáchi ñéhe ín cuachi caja ña ná quivi ñayivi. ⁵⁷ Joo ndixahvi Ndióxi jáchi chindeé a mí ña ná cuu quee vaha í sahá ña nacaja Jesucristo, xitoho í saha yo.

⁵⁸ Saha ña cán queá ndítahan nu ndó, ñani máni i, na cúu cuénta Jesús, coo ndacú ini ndó xihín tuhun Ndióxi. Ta co xíní ñúhú jándacoo ndó ña cándee ini ndó mé á. Ta ndítahan nu ndó ndíhi ini ndó caja chúun ndó cuénta mé á jáchi sa cándaa vaha ini ndó ña a juú ña uun cúu toho chuun cája ndó jáchi ín Jesucristo, xitoho í xihin ndo.

16

Tá ndítaca jiuhún ña jasa na nuú na cúu cuénta Jesús

¹ Ta viti cúni ndicani i nu ndo ndá quiahva ndítahan caja ndó tá jánditaca ndó jiuhún ña jasa ndo nuú na cúu cuénta Jesús ndúu ñuu Jerusalén. Xíni ñúhú caja ndó tá quiahva najánaha i nuú na cúu cuénta Jesús ndúu estado Galacia.

² Ña ndítahan caja ndó queá: tá in in domingo xíni ñúhú tavá xóo ndó táhan jiuhún ña sácú ini ndó jasa ndo jatá ña nandiquehe ndó sahá chuun nacaja ndó. A cándati toho ndó janda quiahva ná saa i jan jáchi xíni ñúhú jánditaca cuéé ndó ña. ³ Ta caxi mé ndó ndá na cúni ndó cañehe jiuhún jan ñuu Jerusalén. Ta tá ná xinu coo i jan chindahá i na ña ná cuhun ñehe na jiuhún ñuu cán. Ta chindahá i in carta xihin ná ña ná quiahva na ña xihin jiuhún jan nuú na cúu cuénta Jesús ndúu mé cán. ⁴ Ta tá cúni Ndióxi já cuhun ri yehe va xihin na jan anda ñuu Jerusalén.

Sácú ini Pablo cuhun da coto nihni da na cúu cuénta Jesús ndúu java ga ñuu

⁵ Saa i coto nihni i ndohó cúni. Joo jihna ñúhú yaha i coto nihni i na cúu cuénta Jesús ndúu estado Macedonia. Ta anda jávi saa i ñuu Corinto jan. ⁶ Ta tá cúni Ndióxi candoo nahá chá i xihin ndo. Á tá coo ta coo i ní tiempo vixi xihin ndó jan. Ta tá sa ná quee e cuhun i inga ñuu já cuu chindeé ndó yehe. ⁷ Co cúni toho i coto nihni númí i ndohó. Ña cúni queá candoo tóo i coo nahá chá i xihin ndo jan tá cúni Ndióxi. ⁸ Joo candoo tóo i coo i ñuu Efeso yóho janda quiahva ná yaha vicó Pentecostés. ⁹ Jáchi mé a ndaa núná nuú i cája chúun i cuénta Ndióxi yóho jáchi cuahá ndivaha na ndíquehe vaha na tuhun Ndióxi vatí ndúu cuahá na co cúni yehe sahá chuun cája i yóho.

¹⁰ Tá ná xinu coo Timoteo nu ndúu ndó ñuu Corinto jan, ndítahan ndiquehe vaha ndó da já ná cajii íni da coo da

xihin ndo. Jáchí cája chúun da cuéntá Jesucristo, xitoho í tá quiahva cája chúun yehe. ¹¹ A cándají ndó da. Ña ndítahan caja ndó queá chindeé ndó da já ná coo vaha ini da quixi da nuú i. Jáchí yehe xihín java ga na cúu cuéntá Jesús ndáti nde xinu coo da nu ndúu nde yóho.

¹² Ta viti cúni ndicani loho i nu ndó sahá ñani, da naní Apolos. Mí i naxica tahví ndivaha i nu dá ña ná saa da xihín java ga na cúu cuéntá Jesús coto nihni da ndohó. Joo co cúni da caja da ña viti. Cája i cuéntá tá ná nuná nu dá já saa da coto nihni da ndohó.

Ndindayí Pablo na cúu cuéntá Jesús ndúu ñuu Corinto

¹³ Cuéntá vaha coo ndó. Xíní ñúhú ndacú coo ini ndó jáchí cándeé ini ndó Jesús. A yíhví toho ndó. Canduu ndacú ndó íchí cuéntá Jesús. ¹⁴ Xíní ñúhú caja ndó tóco ndihi ñaha sahá ña quíhvi ini ndó ñani táhan ndó.

¹⁵ Candehé ndo ñani i, na cúu cuéntá Jesús. Sa xíní vaha ndó sahá na vehe Estéfanos, mé na nu cuítí nandihvi íchí cuéntá Jesús estado Acaya. Sa nandiquiahva na mé ná chindeé na na cúu cuéntá Jesús. ¹⁶ Ña cúni cacá i nu ndo cúu ña ná cuni johó ndó ña sáhdá na cán nu ndó caja ndó. Ta xíní ñúhú caja ndó tá quiahva cúni ndihi na cán jáchí chindeé na ñayivi ta cája chúun vaha na cuéntá Jesús.

¹⁷ Cájii ini i jáchí naxinu coo Estéfanos xihín Fortunato xihín Acaico nu íin i ta nachindeé na yehe. Ta vatí a cuú quixi mé ndó nuú i ¹⁸ joo na yóho sáhan na tuhun ndéé ini i xihín ñaha cuéntá Ndióxi tá quiahva nacaja na xihín mé ndó. Mé a ndaa ndítahan nu yo caja cáhnu í na cája tátuhun na yóho.

¹⁹ Na cúu cuéntá Jesús ndúu estado Asia chindahá na Ndióxi coo ndó. Ta jári Aquila xihín Priscila chindahá na Ndióxi coo ndó. Ta jári na cúu cuéntá Jesús táca cája cáhnu Ndióxi vehe na cán chindahá na Ndióxi coo ndó.

²⁰ Tóco ndihi na cúu cuéntá Jesús ndúu chóho chindahá

na Ndióxi coo ndó. Ta xíní ñúhú caħan Ndióxi xihin táhan ndó ta tatí yúħu táhan ndó ta yji caja ndó ña.

²¹Yeħe cúú Pablo ta xihin ndáħa mí i cáhyí i ña yóho nu ndó ta chíndahá i Ndióxi coo ndó.

²²Ta ndá na co quíhví ini Jesucristo já ná cuħun cháhan jata ná. Cama chá ná quixi Jesucristo, xitoho í.

²³Ña cúni queá ná caja cuħa Jesucristo, xitoho í ñamaní xihin ndó. ²⁴Quíhví ini i tóco ndihi ndó jáchi tóco ndihí cúú yó cuéntá Jesucristo, xitoho í. Já ná coo.

Tuhun saá ña najándacoo Jesucristo nu yo: El Nuevo
Testamento en el mixteco de Silacayoapan
New Testament in Mixtec, Silacayoapan (MX:mks:Mixtec,
Silacayoapan)

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 27 Sep 2019 from source files dated 27 Sep 2019

7f2d3ecf-6d15-55a5-9081-6e970474df2f